

**EKALESIA FAAPOTOPOTOGA KERISIANO
SAMOA**

**TUSI MO FAIA’OGA O A’OGA ASO SA
*SUNDAY SCHOOL TEACHERS TEXTBOOK***

2024



**VASEGA MATUTUA FAAPITOA
JUNIOR YOUTH
(17 – 20 tausaga)**

**MATAGALUEGA O A’OA’OGA KERISIANO
*DEPARTMENT OF CHRISTIAN EDUCATION***

**EKALESIA FAAPOTOPOTOGA KERISIANO
SAMOA**

**TUSI MO FAIA'OGA O A'OGA ASO SA
*SUNDAY SCHOOL TEACHERS TEXTBOOK***

2024



**VASEGA MATUTUA FAAPITOA
JUNIOR YOUTH
(17 – 20 tausaga)**

**MATAGALUEGA O A'OA'OGA KERISIANO
*DEPARTMENT OF CHRISTIAN EDUCATION***

UPU TOMUA

E mua'i faatalofa ma faafeiloai atu i le paia tele o le Ekalesia Faapotopotoga Kerisiano Samoa i ona tulaga faalupeina, i le Suafa pele o Iesu Keriso lo tatou Taitai Sili. Ua faamalo le soifua manuia ia outou susuga i Toeaina, susuga i Faafeagaiga, Faifeau, A'oa'o ma Faletua, tainane foi afioga i Tiakono, susuga i alii ma tamaitai Faiaoga o tatou Aoga Aso Sa, faapea foi peresetene ma taitai o tatou Autalavou. Ia viia lo tatou Alii, i la outou molimau atu, o fita i tuga ai mo le Alii ma le Tala Lelei, e ala atu i mataupu a le Aoga Aso Sa ma Autalavou.

Ua tatou talitonu, o le Tusi Paia o le Upu a le Atua mo tagata uma, ma ua i ai i totonu vaega uma ua tatou naunau ia iloa, ina ia tumau mausali pea lo tatou sootaga lelei ma le Atua, ma ia tatou ola ai i le ala tatau e tusa ma lona finagalo. O le mea lea ua tatou talitonu ai, i le matuā taua o le a'oa'oina tatau o fanau laiti ma talavou mai le Tusi Paia. E ao ina a'oa'oina atu ma le faautauta lelei, le uiga moni o vaega o le Tusi Paia ua fia a'oa'oina atu, i se auala talafeagai e tusa ma le matutua ua i ai tamaiti.

1. O le Tusi o Aoga Aso Sa ma Autalavou, ua saunia lava faapitoa mo Aoga Aso Sa ma Autalavou a le Ekalesia Faapotopotoga Kerisiano Samoa. O lona uiga o le meatotino lava a le EFKS, e le faatagaina faaletulafono ona toe lomina e se tasi, e aunoa ma le faatagaga a le Ekalesia. O lea e fautuaina ai foi le Aufaigaluega, o faiaoga o Aoga Aso Sa ma Taitai o Autalavou, i le taua o le teu faalelei pea o Tusi Aoga, e toe saili i ai mo se fesoasoani pe a moomia.

2. O Mataupu o Tusi Aoga Aso Sa ma Autalavou 2024, ua maua lea i le upega Tafailagi (website) a le EFKS; www.cccs.org.ws. Faamolemole ia fesootea mai lo tatou Ofisa i Mulinuu mo se fesoasoani, ma nisi vaega e fia malamalama i ai, i le telefoni 24340, po o le e-meli-extneduc@cccs.org.ws.
3. Ua lē o toe fa'aalia i le faasologa o Mataupu i Aso Sa taitasi, vaega masani o le a'oa'oina o mataupu, e pei o le Tatalo Amata, Faafeiloai le vasega, faamanatu mataupu talu ai, tatalo e faapaia ai le sene ma le Tatalo Faaii. Peitai o vaega masani nei e tatau lava ona fai i Mataupu o Aso Sa taitasi.
4. Mo le silafia e Tamā o le Ekalesia ma le aufaigaluega faifeau, e i ai le taimi e toe saili mai ai e lo outou mamalu le ofisa o le MAK, mo nisi Tusi Aoga. Peitai, ua māua e le ofisa nei, o nisi tagata, e lē o ni tagata lotu iā tatou, auā latou te leiloa le suafa o lana faifeau. O lea e tatalo atu ai, o le a lē toe taliaina ni tagata faapea e omai i ni Tusi, sei vagana faafeagaiga ma ē omai ma se faamaoniga mai lana faifeau. E lē mafai foi ona faamatuu atu ni Tusi Aoga i nisi o la matou aufaigaluega e aunoa ma se faamaoniga mai le faifeau.
5. Afai ua i ai se lape i le galuega nei, e matua atu i la outou tofā faale-Atua e magalo ai le aufaigaluega vaivai. Pe afai foi e i ai ni fautuaga taua mo le faaleleia atili o le galuega, faamolemole fesootea'i mai lo tatou Ofisa i tuatasi o i luga, pe lafo mai i le Pusa meli 163, Apia.
6. Ua saunia le Tusi Aoga mo le Vasega Matutua Faapitoa e le susuga ia Peteru Seiuli FS, Ietitaia Solipo FS ma Tavita Pulu FS

Ia faamanuia le Atua i le galuega o lenei tausaga, auā le a'oa'oina o alo ma fanau a le Ekalesia, ina ia tutupu a'e ma le fiafia e faitau le Tusi Paia ma ola matata'u i le Atua.

Soifua ma ia manuia
O la outou auauna

Maleifua Tanielu

(Faatonu A'oa'oga Kerisiano)

VASEGA MATUTUA FAAPITOA 2024
MANATU AOAQ: O LE ATUA E OU MEA UMA

MANATU TAIALA O IANUARI - MATI:

**“TAPENA LELEI AO TATOU SAUNI
 FOLAU”**

IANUARI

28	Ofoina atu le ola atoa	Ioane 10: 1 – 10
----	------------------------	------------------

FEPUARI

04	Faailoa le Alofa	Roma 12: 9 – 21
11	O le Atua taumasuasua	Esoto 16: 1 – 16
18	E i ai le mea ua faaletonu	Kenese 3: 1 – 13
25	‘Aua e te fesili mai iā a’u	Faamasino 9: 6 –
21		

MATI

03	Ua fia aai tamaiti	1 Korinito 3: 1 – 9
10	Liliu oe, ia ū ane totonu i fafo	Mareko 7: 14 –
23		
17	Faatoilalo le leaga i le lelei	
		1 Samuelu 24: 1 – 22
24	O le ulufale atu o Iesu i Ierusalema (Aso Sa Laupama)	Mataio 21: 1 – 11
31	O le ola ina ua mavae le ola (Toetu)	1 Korinito 15: 50 – 58

MANATU TAIALA O APERILA – ME:

**“IA FAI PEA TATOU MA VIIGA O LE
 ATUA”**

APERILA

07	O le aoaiga a le tamā	Eperu 12: 3 – 12
14	Lē tausisi i faiga masani	Kalatia 2: 11 – 21
21	O le ala i lou lava faaleagaina	
		1 Samuelu 17: 54 – 18:
		16
28	O mea tāua mo le tu’uga	1 Timoteo 6: 1 –
10		

ME

05	Ua faamautū le aiga o Iosefa i Aikupito	
		Kenese 47: 1 – 12
12	Faatelē lou fatu (Aso Sa o Tinā)	Mareko 7: 24 – 30
19	Malologa Fono Tele	
26	Toto i tafatafa o vaitafe	Salamo 1: 1 - 6

MANATU TAIALA O IUNI: “O LE MALO O LE ATUA”

IUNI

02	E paia le Atua	Esoto 19: 1 – 25
09	Ala i le malo o le lagi	Mataio 6: 25 – 33
16	Ia manatua le Atua i aso uma	
		Teuterenome 6: 4 –
15		
23	O le malo o le Atua, o le amiotonu ma le filemu	
		Roma 14: 13 – 23
30	Ia faia le finagalo o le Atua	Mika 6: 1 – 8

MANATU TAIALA O IULAI:

“O LE ATUA O LE MALOLOGA LELEI”

IULAI

07	Uluai sapati	Kenese 2: 1 – 3
14	O galuega alofa	Mareko 3: 1 – 6
21	O Areto Sa	1 Samuelu 21: 1 –
6		
28	O Iesu o le malologa o agaga	Ioane 3: 16 – 21

MANATU TAIALA O AOKUSO:

“IA FAI OE MA FAAOLA I ISI TAGATA”

AOKUSO

04	Manatua na o lelei	Kenese 50: 15 – 21
11	O uō a Iesu (<i>Aso Sa o Tamā</i>)	Ioane 15: 12 – 17
18	Ua lavea’iina le nuu	Eseta 4: 4 – 17
25	Ua pupula mata o le tauaso	Mareko 10: 46 – 52

MANATU TAIAlA O SETEMA:

“TALA LELEI O LE ALOFA TUNOA”

SETEMA

01	Suiga (Aso Sa Tala Lelei)	Ruta 1: 6 – 22
08	Malosi i mea lē aogā.	2 Korinito 12:5 –
10		
15	Ola i a Keriso	Ioane 8: 12 – 20
22	Iesu o le matagofie	Fa’aaliga 3:1 – 6
29	Ia mautu le faavae	Mataio 7:24 – 27

MANATU TAIALA O OKETOPA:

“FAATASIGA I LE MALO LE LAGI”

OKETOPA

06	Tapena mo le Lotu Tamaiti	
13	Aso Sa Lotu Tamaiti	
20	Malologa Lotu Tamaiti	
27	O fanau o le faapolopolo mo aso leaga	Salamo 127: 1 – 5

MANATU TAIALA O NOVEMA:

“TAGATA ATOA MO LE ATUA”

NOVEMA

03	Foai uma	Luka 18: 18 – 30
10	Alofa e le uma	Isaia 41: 14 – 20
17	E malosi ma u’au’a pe a pulupululima faatasi	1 Korinito 11: 17 – 22
24	Mativa i foliga ae mauoa i le alofa	2 Korinito 9: 1 – 15

MANATU TAIALA O TESEMA: “MŌLĪ O LE AVA”

TESEMA

01	O le malamalama i le pogisa	Isaia 9: 1 – 7
08	Meaalofa Sili	Efeso 4: 7 – 13

VASEGA MATUTUA FAAPITOA 2024

MANATU TAIALA O IANUARI - MATI: TAPENA LELEI AO TATOU SAUNI FOLAU

O le fautuaga masani mo so o se faamoemoe, auā e le mafai ona toe foi i tua, e toe faufau ni faaletonu a ua i le vasa le folauga. E le o taimi uma foi o le folauga e malū; a o le tapena ma saunia lelei, o le a maua ai pea le mafanafana ma le to'amalie ao gasolo feau o lenei tausaga.

ASO SA: 28 IANUARI 2024

MATAUPU: OFOINA ATU LE OLA ATOA

SINI: Ia a'oa'o tamaiti ia malamalama, i le uiga o le soifua atoatoa o le Atua, na ofo mai mo le lalolagi.

TUSI FAITAU: Ioane 10: 1 – 10

FESOASOANI MO FAIAOGA:

O la tatou mataupu o lenei Aso Sa, o lo'o faatauaina ai le ola ofoina atu atoa, e faatino ai so o se tiute po o se auaunaga ua tofia, ma valaauina i ai e fai. O le tusi lenei o Ioane; "O le Ola," o le mataupu autu lava lea o tautala i ai le Tusi atoa lenei. Ma o le faataoto lenei e uiga i le leoleo mamoe lelei, ua tuuina atu atoa lona malosi ma lona ola, e tausi ai mamoe ina ia saogalemu, lea ua aumai e tuliloa ai le uiga o la tatou mataupu o lenei Aso Sa.

O le tele o eleele o Iutaia i le taimi o Iesu, e gaoā ma e lē lelei mo faatoaga; O le ala lenā, sa mafuli ai le tele o tagata i galuega tausi manu, e pei o le leoleoina o mamoe. O le tele la o aso ma le umi o le taimi o mafuta le leoleo mamoe ma ana mamoe o tausi, o le faasolo foi lenā ina masani lelei mamoe i leo o ō latou

ta'ita'i, ma mausalī atili pea le feso'otaiga lea. O le vaaiga sili ona mataina, taimi e tata'i atu ai lafu mamoe i le vai e feinu. E foliga mai iinā, ua feleiloga'i faatasi mamoe, ma ua faigata ona toe iloa mamoe o le isi lafu mai le isi lafu. Peitai, a oo ina toe foi, e valaau lava le leoleo mamoe ia, i lana valaau masani i ana mamoe. E lagona lelei mai foi e ana mamoe, e le gata o lana upu o valaau ai, a'o lona leo foi, ona mulimuli atu lava lea o mamoe ia i lo latou taitai ua latou iloa, e le mafai ona fefiloi ma fesēta'i faatasi. A taitai foi le lafu i le vao lelei e aai ai, e muamua le leoleo mamoe ae mulimuli atu le lafu, ina ia mautinoa le saogalemu o le ala. Le mafanafana lea o le feso'otaiga a le leoleo mamoe ma ana mamoe, o tū matila mai ai le alofa e ala i le ola ofoina atu atoa o le leoleo mamoe, mo le saogalemu ma le ola lelei o ana mamoe.

Le ata lea o le Alofa faamaoni o le Atua i tagata, e ala i le soifua atoa o Iesu, na sasa'a mai ina ia ola tagata. O le leoleo mamoe la o Iesu, o Ia lava foi o le faitotoa o le lotoa o mamoe. O le mamoe lava (le tagata) e ui atu ia Iesu, e faaolaina. A o le tagata e le ui atu i le faitotoa, ae taumafai e ui atu i se isi ala, e le gata o ia o le gaoi, a'e lē ola foi.

Fanau, o Iesu, e fua atili mai ai le ola. E le o le tele o mea faa-le-tino i o tatou lima, ae o le tele o fua faa-le-agaga, e ala i le loto e talitonu ma faatuatua ia Iesu e ola ai.

GALUEGA FAATINO: (Tusiga Solo)

Tusi sau solo pu'upu'u e uiga i le Leoleo mamoe lelei. E 2 fuaiupu o le solo, ae 4 laina i le fuiaupu e tasi.

PESE: 158 (Iesu ou te fia fai)

A'OA'OGA:

1. O Iesu tatou te malu ai.
2. Alofa atu e pei o Iesu.
3. Ia aoga lou ola mo le Alii

ASO SA: 04 FEPUARI 2024

MATAUPU: FAAILOA LE ALOFA

SINI: A’oa’o tamaiti ia malamalama, o le alofa e iloa mai, i se mea lelei e te faia i le isi tagata.

TUSI FAITAU: Roma 12: 9 – 21

FESOASOANI MO FAIAOGA:

O le Atua o le alofa lava Ia. A tatou talanoa la i le alofa o lona uiga, ua tatou talanoa i le Atua. O la tatou mataupu la o lenei Aso Sa, o tuliloa ai, pe faapefea ona fa’aali mai le Alofa o le Atua i le tagata. O le upu moni, e le mafai ona iloa le alofa lea e le tagata, na o ia lava. Ae fa’aalia manino mai i le va o oe ma le isi uso a tagata, pei ona tautala i ai le Aposetolo i la tatou tusi faitau, i mea lelei e tatau ona fai, ma mea lē lelei e tatau ona tu’u. Ona ta aofai mai lea i le f.21. “Aua tatou te toilalo i le leaga, a ia toilalo le leaga ia i tatou.”

E mafai ona tatou ola faafoliga, iā tatou upu, o o tatou uiga fa’aalia, o a tatou faatinoga teuteu-lumafale, ma isi uiga e tele, pei tatou te alolofa ma fai mea lelei, ae leai. Ae ao ina tatou manatua le uiga o fetalaiga a Iesu o i ai i le Mataio 7: 12. “O mea tatou te loto e fai mai e tagata ia tatou, ia faapena foi ona tatou faia ia i latou.” O le Alofa faa-le-Atua o talanoaina nei, e matuā tigaina ma faigatā, auā e alu ai tupe, taumafa, o le malosi ma isi mea e tele, aemaise o le loto ia onosai, ava ma faamagalalo. Ae o le ala lea, po o le faataamilosaga o le alofa faa-le-Atua, e te alofa atu ma foliga e te mativa ai, a o lo o fai mai foi e le isi iā oe le alofa lava lea, ma e toe mauoloa ai. ‘Aua laia e te faatagā alofa. Ia ola fefaapalepalea’i ma fealofani faatasi. Ia feavata’i ma onosai. Onosai foi i faigatā o le alofa, auā o le onosai e o faatasi ma le tatalo faatupu malosi. O le olaga e mafuta pea ma fetapa’i faatasi ma tagata i aso uma ma faailoa ai le alofa lea. O

le upu a le tasi tinā iloga o le Tala Lelei fai mai, (Mother Theresa) “A aunoa se tagata ma lona faia o se mea lelei i isi tagata i se aso, o se aso maumau ma lē aogā lea aso o le ola.”

O le f 17 – 21, o iloa mai ai le totonugalemu o le olaga o le Kerisiano, auā afai tatou te alolofa atu i se tasi e pei ona alofa mai le Atua iā i tatou, tatou te lagona foi le loto faamagalalo. Auā o le Alofa Tunoa, o le alofa fua mai o le Atua. E le o se mea e tatau ona maua e se tagata ona o sona lelei. Faataitaiga: A e avea se ipu vai e inu ai se tagata sēsē o fai ma ou fili, e te lē o faatagaina, lana mea sesē. A’e o lo o e amanaia, faamagalalo ma alofa atu i ai, le afaina ona sesē, (agasala). E pei foi ona faia e Keriso iā i tatou. O le f.20 – O le tu faa-Aikupito lē feaveai o malala ola i luga o ulu, e faailoa ai le salamō. O le fa’aogaina la e Paulo iinei, o lona uiga o lo o ia faapea mai – Ia tatou agalelei atu i o tatou fili, e avea ma ala e matamumuli ai, ma liliuese ai mai a latou agasala.

Fanau, taumafai e faailoa atu le alofa o le Atua, e ala i lou tausisia lelei o le va ma isi tagata. Taumafai foi e liliu lou fili ia avea ma au uo. Sa mativa foi Iesu, ina ua ofo atoa ma foai mai lona soifua atoa, e le gata ina ia tatou lelei ma Ia, a ia tatou ola foi i lona Alofa.

Uiga o Upu ma Fuaitau:

- i) fetu’u (f 14) - faamalaia (upu e faailoa ai le ita i le isi tagata.
- ii) toasa (f.19) - lagona le lē fiafia/ita
- iii) faafaupue (f.20)- faateleina/faaputuputu

GALUEGA FAATINO:

Faatulagana sa’o po o le toe fetu’una’i

Tusi le numera sa’o (1 – 5) i le poloka e tatau ona muamua, ma faasolo ai; mai le leaga seia oo ina faailoa mai le Alofa.

	<u>Tali</u>
<input type="checkbox"/> - Lima foai	2
<input type="checkbox"/> - Fautuaina	3
<input type="checkbox"/> - Lima mau	4
<input type="checkbox"/> - Salamo	1
<input type="checkbox"/> - Faatuatua	5

PESE: 71 (Ua ou vivii ma faafetai)

A’OA’OGA:

1. Alofa i lou fili
2. O Iesu le Alofa sili
3. ‘Aua le ola faafoliga.

.....

ASO SA: 11 FEPUARI 2024

MATAUPU: O LE ATUA TAUMASUASUA

SINI: A’oa’o ia malamalama le vasega, o le Atua e ou mea uma lava.

TUSI FAITAU: Esoto 16: 1 - 16

FESOASOANI MO FAIAOGA:

O le Esoto 16: 1(ff), o lo o faaulutalaina faapea, “Ua fagaina Isaraelu e le Atua i le vao.” O le fafagaina o Isaraelu e le Atua,

ona ua oo i fofoga o le Atua le iuleo o le faaseā ma le muimui o le nuu, talu ai lo latou fia aai. E i ai itu le manuia o iloa mai le nuu i le tala. Muamua, o lo o galo ia Isaraelu, e le o Mose ma Arona o muimui i ai, a o le Atua. Lua, o le Atua na aveesea latou mai Aikupito ona o le pologa, a o lea ua toe fia o i ai, ona o meaai. Tolu, o le malaga o fai nei i le vao, o le Atua o lo o ia faatautaia; ma isi lava itu e tele. O lona uiga, so o se mea e moomia e Isaraelu i le malaga o fai nei, e valaau i le Atua e ala atu ia Mose ma Arona, e pei ona sau ai ae le o le muimui.

O Sina o tāua, o le toafa, o le nofoaga e naumati ma oge vai e le ola foi ma fua lelei ai ni laau. O le aso sefulu lima (15) o lona lua (2) o masina talu ona o ese mai Aikupito, lea e tupu ai le faafitauli lea. O mea ai lava ua muimui ai, ma toe ta’uta’u Aikupito fai mai e lelei, ae sa pologa ai.

A’o faigata o latou fetaii, e le o se toasa o le Atua, a’o ala lava e saili ai le loto faatuatua ma le talitonu o le nuu i le Atua. Lea la ua fetalai le Atua ma foai mai meaai, e pei ona sa tatou faitauina. O lo latou amanaiaina e le Atua; lea ua fa’aalia, ua le gata ina foai mai meaai, ina ia maua pea le ola faa-le-tino. Ua avea ai nei meaai o se faamanatu tāua i le Isaraelu, o le Atua e taumasuasua, o ia te Ia mea uma.

Afai foi o le vao, o se nofoaga gaogao ma lē aina i le manatu o le nuu, a’o lea ua avea nei, e le gata o le nofoaga o le ola mai le Atua. A ua mautinoa ai foi e Isaraelu, le taumasuasua o le Alofa o le Atua. Fanau, o la tatou malaga o fai nei, e ono luitauina i le matelaina i nisi taimi. A’o luitau o lo tatou ola faatuatua po o mautu ma tutumau, ma tatou saga iloa tino ai le taumasuasua o le Atua; e leai se mea na te lē maua mo tatou. O le Atua na foai atoa mai lona soifua e ala ia Keriso Toetu; ina ia ‘aua nei o tatou toe muimui, ae faatuatua ia te Ia i le loto atoatoa.

Uiga o Upu ma Fuaitau:

- i) vao o sina (f.1) - o le toafa

- ii) Ailima ma Sinai (f.1) - o igoa o ogaeleele, poo vaega eleele, e pei o ni nu'u.
- iii) sauto'a (f.14) - E foliga i se kiona, po o se aisa e toulu ifo ma to'a (hail)
- iv) Omera (f.16) - O le tele po o le lapoa e tusa ma le 2 lita

GALUEGA FAATINO: Taliga Fesili

- 1. O le a le aso lea e tupu ai le muimui tele lea?
Tali: O le aso 15 o le masina e 2, talu ona omai mai Aikupito.
- 2. O ai lea ua muimui e le nu'u e tusa o le tala?
Tali: O le Atua.
- 3. Na faapefea ona iloa e le nuu le Atua?
Tali: Na iloa i lona pupula mai i le ao.
- 4. O le a le auala na iloa ai e le nuu, o le Alii o lo latou Atua?
Tali: Ina ua foai atu e le Atua meaai, i le taeao ma le afiafi o aso uma, e ala i lona lava mana.
- 5. O le a le fua o meaai e tatau mo le tagata e toatasi?
Tali: Tasi le Omera (2 lita)

PESE: 70 (Ua tele le alofa)

A'OA'OGA:

- 1. Tatalo ma le faatuatua i le Atua na te aumai.
- 2. 'Aua le muimui i le Alii.
- 3. O le Atua e ou mea uma.

.....

ASO SA: 18 FEPUARI 2024

MATAUPU: E I AI LE MEA UA FAALETONU

SINI: Ia malamalama tamaiti, e i ai faaletonu pe a le usiusitai i le Atua.

TUSI FAITAU: Kenese 3: 1 – 13

FESOASOANI MO FAIAOGA:

Tatou te iloa uma lava, tāiga masani ma le natura o le soifuaga o tatou i ai nei. So o se faamoemoe lava, e tulimata'i lava lona faagasologa ina ia taunuu manuia. Vagana ua i ai se faaletonu i lona faagasologa, ona le tau lea i le taunuuga o faamoemoe i ai. O lo o alia'e mai le tala sa tatou faitau nei, le masei lea. O le Atua, na ia faia le tagata i ona foliga paia, o le faailoga o lona alofa. Ona ia tuu lea i le faatoaga e saoloto ma pule i mea uma, vagana le laau e tasi o vaoia mai. O le va tapuia lea, e mautu ma solo lelei i le usiusitai o le tagata, ma lona talitonu i le Atua alofa, e manuia ai. Peitai, ina ua valaau le Atua (f.9) "O fea o i ai oe", ma le tali a Atamu i le (f10); Ua fefe ma lafi, o iina e iloa ai, e i ai le mea ua faaletonu i le va nonofo lea. "Ua fefe o le a, pe afai o lo o ia iloa, o le siufofoga alofa o le Atua lea e valaau? Ua lafi o le a?" E le toe tau vailiilia le tala atoa ua tatou iloa. O le gata, o Satani lava lea, e tasi a lona faamoemoe, ia toso ese le tagata mai le Atua. O lana auala faatosina lea ua sēsē ai le fafine. "'Aua e te ai ai, (Kenese 2: 17)" O le Atua na aumaia le tulafono. Ua le usiusitai le fafine, ona o le suamalie o upu tau faaosooso a le gata, "Lua te le oti lava" (f.4) "E aveai ai oulua pei ni atua" (f.5) – O le naunau i le pule, ua taumafai ai le tagata e tu'u ia i le tulaga na o le Atua e tatau i ai. "O le a pupula o oulua mata," (f.5) ma iloa le lelei ma le leaga." Talofa e, lea ua le gata ina lafi ua mā, toe mataga, ae ua tu'u ai solo foi le mafuaaga. Ae tasi lava le pogai, "O le lē usiusitai i le Atua." Fanau, e taua le ola usiusitai i matua, faiaoga, ma i latou

uma e alolofa moni ia outou pei o Iesu; Auā e leai ni faaletonu e alia'e ai, na o manuia e maua ai. O Iesu foi ma lona soifua usiusitai i le Atua lona Tamā, na ui atu i le oti ae na taunuu i lona toetu manumalo, ina ia ola tagata e faatuatua i lona Alofa.

GALUEGA FAATINO: Taliga Fesili

Ia matuā mafaufau loloto i le Atua, o lou iloa o Ia, ma lau faitau i le Tusi Paia, ona tali mai lea o fesili faalauaitete o i lalo:-

1. (a) O le a sou iloa, na mafua ona valaau le Atua; “Atamu, o fea o i ai oe? (f.9), ona e le o iloa e le Atua le mea o lafi ai Atamu, po o se isi mafuaaga?

Tali: Sa silafia e le Atua, auā e le lilo se mea i le Atua.

(e) O le a le mafuaaga o lau tali?

Tali: Sa silafia lava e le Atua, ae sa valaau pea le Atua pe iloa e Atamu ua sēsē, ona ‘aua lea le lafi ae alu atu, ua ia lagona lona sēsē. O le isi itu, o lo o saili mai le Atua e fia mafuta i lana tagata, pe afai na te iloa ua sēsē, ona salamō lea, ae ‘aua le lafi e le lilo ma magalo ai.

2. O Atamu ma Eva sa tauaso pe leai?

Tali: Leai.

3. O ai le isi igoa o le gata?

Tali: Satani

4. O lea ua iloa o le gata le pogai autu o le mea ua tupu; ae aisea ua a’afia ai fua Atamu ma Eva?

Tali: E le o le autu po o le mafuaaga o saili; o le mea o fia tuliloa; po o usiusitai i le Atua pe leai.

PESE: 276 (Ua ta’ua mai le malo)

A’OA’OGA:

1. Faalogo lelei ma usitai i le Atua.
2. Talitonu i le Alofa o le Atua.
3. Matalia i le tiapolo tau faasese.

.....

ASO SA: 25 FEPUARI 2024

MATAUPU: ‘AUA E TE FESILI MAI IA A’U

SINI: Ia malamalama tamaiti, e tāua le fesili ae le tau fesilgia fua, le ola o aogā ma fua tele mo le Atua.

TUSI FAITAU: Faamasino 9: 6 – 21

FESOASOANI MO FAIAOGA:

E tāua tele lou faitauina muamua o le tusi atoa o ta’u atu iinei; Faamasino 8: 29 – 9: 5, 22 (ff), ona o aofia ai i totonu le vaega tonu o agai i ai la tatou mataupu. O le tala atoa lava lenei i le fasiotiga o atalii o Kitiona, o Ierupa’ala lava lea, e lo latou lava uso o Apimeleko. O Apimeleko, o le atalii o Kitiona lana palake mai le nuu o Sekema. Ina ua oti Kitiona, ona usui ai lea e Apimeleko le aiga uma ma le nuu o lona tinā o Sekema, ina ia loto atu e fai o ia ma tupu ia Isaraelu. Na ioeina lava lenei taupulepulega, e ui ina e le lelei. Ona ō lea o Apimeleko ma tagata totoa o Sekema, e fasioti uma le fanau a Kitiona e to’a 70, o i le nuu o Ofira, o le nuu lea o Kitiona. Peitai, na lafi ma sola ese le atalii laititi o Kitiona, o Iotama le igoa, ma faasao ina ai lona ola. O le faauuga la o Apimeleko e fai ma tupu, na alaga mai ai Iotama mai luga o le mauga o Keresema, i le faataoto atoa lea sa tatou faitau nei.

E ui lava o faataoto tatou te fesootai iā Iesu, ao iinei, ua iloa ai i le tusi o Faamasino, le tasi uluai faataoto i le Tusi Paia. O le faataoto o fesiligia ai la’au, pe fia fai ma tupu o laau uma o le vao. A’o le tali; “E leai.” sa latou teena le ofo. E foliga mai e le fetai le faataoto, i le tele o tagata (laau). A’e maise o le avea ma tupu, e fesootai ma le tele o le tamaoaiga, ma le tulaga taitai. Peitai, o lo latou teena; ona o lo o latou faamuamua ma faataua lo latou ola galulue, ma fua lelei o maua mai ai, e tautua ma ofo atu mo le Alii. O le mea moni, e le o le fai ma tupu le mea taua o i ai i le faataoto; A’e o le ofo ua tuuina mai, o le avanoa e fua mai ai ni fua e matuā ese lava ma lē talafeagai, ma ta’uleaogaina ai le ola mo le Alii. Lea lava o taua i le iuga o le tala, le taunuuga leaga o le tagata na fesiligia ma fia fai ma tupu, ona o le faamaualuga ma le faufau leaga, e leai se viiga o le Atua e maua ai. ‘Aua le fesili fua, pe afai o galue ma aoga mo le Alii. Fanau, ‘aua le naunau i le pule ona o le viiga ma mea e maua ai; A’e ia faatāua le ola galue, ma fua aogā mo le Viiga o le Atua; O le ta’u aogaina lava lena o tatou mo le Atua ma lana feau. Na tuua lava e Iesu lona tulaga tutusa ma le Atua ae afio ifo e osi le Taulaga faaola, ina ia tatou ola.

Uiga o Upu ma Fuaitau:

- i) Sekema (f.6) - o le nuu o le tinā o Apimeleko
- ii) Milo (f.6) - o le igoa o le tagata iloga o le nuu
- iii) Aluna (f.6) - o le igoa faa-Eperu o le laau tele ma malosi
- iv) Keresema (f.7)- o le mauga i le nuu o Samaria.

GALUEGA FAATINO: Taaloga faa-le-mafaufau

Tusi le numera o le upu sa’o i totonu o le pusa, e iloa ai, ua e malamalama i le tala.

- O upu nei:
- | | |
|------------------|---------------------|
| 1. Ierupaala | 5. Iotama |
| 2. avā e toatele | 6. Ono sefulu iva |
| 3. Palake | 7. Fitu sefulu |
| 4. Apimeleko | 8. Fitu sefulu tasi |

- (a) → vs 3 = 4
- (e) → 1 vs = 70
- (i) → (1 vs 3) + (1 vs) = 71
- (o) → (8 -) + (7 - 5) = 69
- (u) → 8 - = 4

- Tali:
- a → 1
 - e → 2
 - i → 2
 - o → 8
 - u → 7

PESE: 222 (Aue loto ua leaga ...soesa)

A’OA’OGA:

- 1. ‘Aua le faufau leaga.
- 2. Galue ma fua tele le ola a o le Atua
- 3. Tumau i le faatuatua ma le faamaoni i le Atua

.....

ASO SA: 03 MATI 2024

MATAUPU: UA FIA AAI TAMAITI

SINI: Ia malamalama tamaiti, o le matelāina o Korinito i le faa-le-agaga o le faailoga o ni tamaiti o fia aai pea.

TUSI FAITAU: 1 Korinito 3: 1 – 9

FESOASOANI MO FAIAOGA:

Afai o fia aai e tusa o la tatou mataupu, o lona uiga e le'o ma'o'ona. Afai foi o tamaiti, o lona uiga e le tatau i ai ni meaai malō. O le ata lea o Korinito i le vaai a Paulo, e tusa o le tala sa tatou faitauina. E ui e leai se isi o tatou e fia faalogo o ta'u tamaitiitiina, pe ta'u faatauvaaina, ona o lana amio. Peitai, e le o mafai ona taofia ai le Aposetolo iinei, i lona ta'u tamaitiina o le Ekalesia i Korinito. O lana gagana ua malosi ma foliga sauā, lea ua tetele atu ai iā Korinito. Peitai, o ana upu o afifi atu ai lona lagona naunautai moni lava, ia laveaiina ma ola tagata o Korinito i le Alii, e ala i le talitonu faamaoni ma faatuatua ia te Ia. Auā o fua na e iloa ai ua latou avea ma tagata matutua i le faa-le-agaga, ma ua lē toe tau fafagaina i se suāsusu, e pei o ni tama meamea ia Keriso.

O le faafitauli o tāua i le I Korinito 1: 11 (ff), o lo o iloa mai ai le mea ua tupu i Korinito. Ua fefaatusatusaa'i e Korinito le au-faigaluega, po o ai e sili? Ae po o Paulo, po o Apolo, po o ai lava, o auauna uma a Keriso. Le fefaatusatusaiga lea ua aliali ai le fai kegi, fevaevae'i, ma pei ai lava o ni tamaiti o fia-aai i le talalelei a Keriso. O le manatu o Aposetolo, po'o ai lava le tagata o tala'i atu le tala iā Iesu Keriso le faavae mausali, o tagata uma lava o lo o galulue ma atia'e i le faavae lava lea e tasi, sa ia muai tau atu, ma faavae ai le Ekalesia i Korinito. Auā o a'u o Paulo na amataina (tōtō). O Apolo na faasūsūina, a'o le Atua le autu e ala iā Iesu Keriso, na te faatupuina. O le mea lea o lo o tupu, ua aliali ai le le'i taitai matutua Korinito i le faa-le-agaga, ae pei o ni tamaiti laiti o fia aai pea, o tama meamea iā Keriso. O tagata ua matutua i le talitonu ma le faatuatua moni iā Iesu Keriso, latou te le faavasegaina ni tagata o le galuega, ae tau o le talia o mea moni e uiga iā Iesu le faavae. O galuega uma foi a le au galulue, o lo o sisila le Atua na te silafia ma tauia e tusa o le tagata ma lana galuega. O tagata faatuatua moni i le Alii, latou te iloa o latou o auauna a le Atua, o le Atua foi o lo o latou ola ai. O le fealofani ma le feagaleleia'i, o le faailoga o le

avea ma tagata matutua i le faa-le-agaga, ua lē o toe fia aai, pei o ē o tama meamea iā Keriso.

O le afio mai foi o Iesu e osi le taulaga o le faaolataga, lea sa maliu ai ma toe soifua mai manumalo. O le faamoemoe ia tatou ola ma malolosi i le faatuatua iā te Ia, ae soia le avea pea tatou ma tama meamea iā Keriso, i lo tatou ola toilalo pea i le agasala.

GALUEGA FAATINO (Taliga Fesili)

1. O le fuaiupu e fia; a'o a foi mea o tāua mai ai, o iloa ai o lo o fia aai pe a Korinito e pei o ni tamaiti?

Tali: O le fuaiupu e tolu (3); o le Matāua ma le Misa.

2. Aisea na fafaga ai e Paulo Korinito i le suasusu i le amataga?

Tali: Ona o le taimi lea o pepe meamea Korinito i le iloa ma le talitonu iā Iesu Keriso.

3. O le mafai e Korinito ona aai i meaai-aano, o le avea lava lea o latou ma tagata matutua. O le a le uiga o lea mea?

Tali: O lona uiga, ua talitonu ma faatuatua ia Iesu, ma ua latou talia o Ia e fai ma faavae o lo latou ola.

4. O ai le tagata o taua i le tala, pei ua mafua ai le vevesi o Korinito?

Tali: O Apolo

5. O ai e sili; o lē e tōtō, po o lē e faatupu, po o lē e faasūsū?

Tali: O lē na te faatupuina, o le Atua lea.

PESE: 333 (Ia to mai le manuia ...sau)

A'OA'OGA:

1. Faavae lou ola i le Alii.

2. Talitonu ma faatuatua i le Atua.
3. O le pepe meamea ia Keriso, o le faailoga o le agasala pea.

.....

ASO SA: 10 MATI 2024

MATAUPU: LILIU OE, IA Ū ANE TOTONU I FAFO

SINI: Ia malamalama tamaiti, i le tāua o le faailoa mai i lou ola faa-le-tino, o le lelei o i totonu o lou loto.

TUSI FAITAU: Mareko 7: 14 – 23

FESOASOANI MO FAIAOGA:

O la tatou mataupu o lenei taeao, e foliga faigatā, i foliga o taoto mai ai i lona faaupuina, peitai, o lona uiga loloto ma tāua mo lo tatou ola faatuatua i le Atua, e faigofie lava, e pei ona tuliloa i le sini. O le mea o i lou loto i totonu, e iloa mai fafo i lau faatinoga o fai i lou soifuaga o aso uma.

A faitau lelei lava i le tali a Iesu i lona ausoo, o lo’o i le (f.18) agai i lalo; o lo’o manino ai, o meaai ma vai e ō i le manava, ma le ala masani e toe foi ai i fafo, e le a’afia ai le loto. A silasila foi i le tusi o Levitiko 11: 1 (ff), e i ai meaai o faasa mai ai, a’o tulafono lava mo le puipuia o le tagata, ona o le talitonuga o Israelu i le Feagaiga Tuai, latou te māmā i luma o le Atua, ona o mea latou te lē fia aai ai. E le o faaleagaina e Iesu le tulafono o meaai, ae na ona ia tosi le ala mo se mea e sili atu, e pei ona ta’u manino mai i le Galuega 10: 9-29, ina ua tu’uese e Iesu tapu ma sã faa-le-aganuu e uiga i meaai. E le o meaai le autū, ae o le tāua o meaai, ua na o se ata faatusa o mea e o i totonu. A o lo o ta’u mai lava e Iesu, o le agasala e amata mai manatu ma lagona

i totonu o le loto o le tagata. I le f.(20-23), o lo o tautino ai e Iesu: O le mea e sau mai totonu, o le mea lea mai le loto, e leaga ai le tagata; Ma o mea lava ia o le a aliali mai i lona olaga, o le manatu leaga, faitaaga, gaoi, fasioti tagata, mulilua ma isi. O la Iesu, ‘aau le faaleagaina tatou e ala i le loto atu i le agasala; ae lelei ona tausisi i le loto māmā, ma ola faamaoni i le finagalo o le Atua. O la Paulo (Filipi 4: 8), o lou faia o mea na e viia ai le Atua, o le fa’aaliga moni lena o mea o i lou loto i totonu. Ma o le uiga moni lena o la tatou Mataupu; O le fa’aalia mai i lou olaga i fafo, o mea lelei o i totonu o lou loto. “Liliu oe, ū ane totonu i fafo.”

Fanau, e iloa mea o i lou loto, i lou olaga faa-le-tino nei. O le finagalo Alofa moi foi o Iesu, sa ia tu’ua ai lona tulaga mamalu e tutusa ma le Atua; ae afio mai e osi le Taulaga faaola, mo taua ma le lalolagi uma ina ia ola ma saoloto mai le agasala.

GALUEGA FAATINO: (Tali mai i fesili o tuuina atu i lalo)

1. O le a le faataoto a Iesu lea e fia malamalama ai le au soo? Tau mai po o le fuaiupu e fia?
Tali: O le f. 15
2. Aisea e le leaga ai le tagata i so o se ituaiga meaai na te taumafaina?
Tali: E le leaga, aua e le’o ō i le loto, a’e o lo’o ō i le manava.
3. Ta’u mai ni mea leaga se lua o sau mai le loto, o tā’ua i le tala.
Tali: So o se lua o mea uma o tā’ua i le f.21 – 22.
4. E to’a fia tagata ia e talanoa i le fale, pe a fua i ai i lau faitau i le f.17.
Tali: E to’a 13. (O Iesu ma lona au-soo).
5. Ua faaletonu lou lauvalo i le meaai na avatu e lau uo, ona e onosai lea ma faapalepale. O le mea tonu lea o

finagalo ai Iesu e tusa o la tatou mataupu pe leai.
Faamatala mai le mafuaaga o lau tali.

Tali: Ioe! O le mea tonu lea o finagalo ai Iesu e tusa o la tatou mataupu. Ua lē afaina le tigā o lou manava a o lou loto o lagona le onosai ma le faamagalo.

PESE: 258 (Le Tupu silisili ... afio mai)

A’OA’OGA:

1. Ia mamā ma faamaulalo lou loto.
2. E silasila Iesu i le loto ae lē o le tino.
3. E tāua le tino, a’e sili le loto.

.....

ASO SA: 17 MATI 2024

MATAUPU: FAATOILALO LE LEAGA I LE LELEI

SINI: Ia malamalama tamaiti, o le faamagalo, o le ala faa-le-Atua e toilalo ai le leaga i le lelei,

TUSI FAITAU: I Samuelu 24: 1 – 22

FESOASOANI MO FAIAOGA:

Sa tatou faitau nei le Tusi Paia, o ta’u manino mai ai le tala i le tuliloaina e Saulo ma ana ‘au, o Tavita, ina ia fasiotia. O lo o manino i le ana o tāua, le avanoa o Tavita na te fasiotia ai Saulo. Sa sufī foi e ona tagata tau, o le avanoa lea ua tuuina atu e le Atua iā ia, e faaumatia ai Saulo lē o lamalama e faaoo le oti ia te ia. Peitai, e le’i talia e Tavita le tu’u-a-lalo a ona tagata. Ua na ona ia sesele ese le pito ofu o Saulo, e fai ma faamaoniga

mulimuli ane ia Saulo, e tele le avanoa sa iā Tavita e fasiotia ai o ia. Aemaise lava o lona lagona e pei ona tāua i le f.6. Ia faamamao e le Alii ia te ia, ona ia faia lea mea, “O le fasiotia lea o le ua ia tā’ua o lona alii, o ia sa faauuina e le Atua. Sa ia taofi foi i ona tagata, ina ia taofia ona latou faia se leaga ia Saulo. Mai le f(8) e o’o atu i le f (15), o lo o aliali ai le faamaoni o le lagona faamaulalo ma le faamagalo o Tavita. Ua le gata ina ifo atu ia Saulo ina ua tepa mai Saulo iā ia, ae sa ia tautino atu foi le avanoa sa ia maua, ae sa ia manatu na te le faia se leaga, a’o mea uma ua lafo i le Atua, o i le Atua le faaiuga faamaoni o le mea o tupu nei. O le isi itu tāua, o manatu Tavita, ana faia le mea o fautuaina ai ia e ona tagata, o le fasiotia lea o Saulo ae fai ia ma tupu, O lona uiga, o lona iuga foi lea mai se isi tagata. I le ma lenei, o lo o tausia lava e Tavita upu o fai ma ana tautinoga i le atalii o Saulo o Ionatana (I Samuelu 20: 14-15), lea foi na fa’aalia i lona valaauina o Mefiposeta e nofo i lona aiga (2 Samuelu 9: 1ff) Mai le (f.8) e oo i le faaiuga, o lo o tāua ai ua tagi Saulo, ma na tautino le sili o le faamaoni ma le sa’o o Tavita i lo ia. Ua ia ta’u atu foi le moni, e fai lava Tavita ma tupu ia Isaraelu. Ina ua lagona e Saulo ia lagona e foliga o ni fa’aaliga mai iā ia; ona ia faaiu ai lea o ana upu i le aoi atu ia Tavita, ia alofa i lana fanau ma le aiga o lona tamā. Sa tautino ma tauto Tavia ia Saulo, na te le faia lava se leaga, o lo o sisila le Alii. Ona taitasi lea ma faasaga le tagata i le mea e alu i ai. Foliga matagofie ia o le loto faamagalo moni o Tavita iā Saulo, lea lava ua manumalo ai le lelei sa ia taumafai atu i ai, nai lo leaga sa taumafai mai i ai Saulo. Fanau, o le aoga lea o lenei tala mo tatou, ia tatou lagona le loto alofa ma faamagalo atu i isi, o tagata uma lava na faia e le Atua. O le Alofa foi o Iesu le Keriso, na ia lē tauia ai lo tatou leaga i se malaia, a ua ia ofo mai lona lava soifua atoatoa, ina ia magalo ma ola ai i tatou mai le agasala.

Uiga o Upu ma Fuaitau:

- i) Enokati (f.1) - o le igoa o le tasi aai o Iuta e lata i le sami oona.
- ii) vao o Enokati (f.1)- o faasino i le toafa o le laueleele lea o Enokati
- iii) papa-o-oti (f.2)- o ana o oti i le vao
- iv) tuia (f.5) - lagona ootia/salamōx
- v) uli mate } - o le uli o le maile tulou
- vi) utu fiti } (f.14)- o le utu malo e maua i tino o manu e pei o puua ma isi

GALUEGA FAATINO:

(Mafaufau loloto i le tala, ona tali mai lea o fesili o i lalo, faamalamalama lelei mai lau tali)

- 1. O ai tagata leaga, tau-fa'a-oso ma fautua leaga o i ai i le tala?
Tali: (i) Vaega s Saulo, sa latou ta'u iā Saulo, o Tavita ma ona tagata o lo o i le vao o Enokati.
(ii) Vaega a Tavita, sa latou fautua iā Tavita e fasioti loa Saulo i le ana.
- 2. O ai o vaega ia e lua e sili ona sēsē; vaega a Saulo po o le vaega a Tavita?
Tali: Vaega a Tavita, ona e lē o ta'u maia i le Tusi Paia se faatonuga mai le Atua iā Tavita, a maua loa Saulo fasioti.
- 3. O le a sou iloa, aisea na tuia ai le loto o Tavita, ina ua ia sesele ese le pito ofu o Saulo, o tāua i le f (5)?
Tali: O le lagona o Tavita, o le mea ua ia faia i le ofu o Saulo, o Saulo lava lea.

- 4. O a fuaiupu o ta'u mai ai ia te oe, ua iloa e Saulo le iuga e oo i ai la lau taufetuliga o fai nei ma Tavita?

Tali: (f 20 – 21)

PESE: 180 (E lelei mea uma ua ia Iesu)

A'OA'OGA:

- 1. Tautuana ia ola faamagalo.
- 2. Fiafia e fai le lelei.
- 3. Ia ola fealofani ma fealolofaa'i.

.....

ASO SA: 24 MATI 2024

MATAUPU: O LE ULUFALE ATU O IESU I IERUSALEMA

SINI: Ia malamalama tamaiti, e tāua tele o la latou alaga atu i le ulufale o Iesu i Ierusalem, a'e faia i le loto talitonu faamaoni.

TUSI FAITAU: Mataio 21: 1 – 11

FESOASOANI MO FAIAOGA:

O le Aso Sa lenei ua tatou iloa i le Kalena faa le Ekalesia, o le Aso Sa o le Laupama, o faamanatu ai le malaga faatupu a Iesu i Ierusalem. O le tala ua tatou masani ai, auā tatou te tau ane ai i tausaga taitasi uma lava, pe a faamanatu le Aso Sa lenei o le Laupama. A'o le itu tāua o fia tuliloa o fai ma faamamafa o lenei Aso Sa, o lau valaau ma lau tualaga ia Iesu o afio atu i le asini, po o faia i lou lagona faaeaea moni ma faamaoni o ia o le tupu, pe leai foi.

O le amataga ma le vaiaso atoa lenei, o tuliloa e tagata Ierusalem, ona o le faamanatuina o le Paseka a Iutaia, e fai i le taimi lea. E lua solo tetele o iloa mai i le vaiaso lena, e ui e le o taua mai le Tusi Paia le isi solo, a'o faamauina i le tala faasolopito. O taimi ia o Pulega a le Malo o Roma, e i ai lava sa latou faatinoga e fai i aso faailogaina faapea, e pei o le Paseka. O le solo muamua la lea, o le solo faa-fitafita, e faafeao atu ai Ponitio Pilato (Pontius Pilate) le Kovana o Roma o i Iutaia, latou te puipui ma faamalasia le taimi atoa o le tausamiga, ae faamautu ma faamaopooopo tumau i olo ma pa o le aai. O solo e lagona ai iuleo eseese; o tagipalau, o savali a fitafita, e le gata o e sasavali, a o i latou foi e tietie i solofanua. E vaaia i lea aso aupega o fu'a, o pulou tau ma isi, o fa'aalia ai le malosi o pulega faa-Emeperosa a Roma (Tiperia), i latou ua faaeaina i tulaga maualuluga e foliga "o alo o le atua."

O le isi solo, o aofia ai se vaega tele e pei o ni tagata faifaatoaga, ma lavalava lē taualoa, ma Iesu le Nasaraeta, o iloa i lona tulaga o se failauga e le nofo mau i se nuu e tasi. O Ia lea o lo o tietie mai i le asini, ma e le faigaofie ona iloa lona ulufale atu i Ierusalem o Ia o se tupu. Peitai, o lo o alalaga tagata e viia o Ia; tā ane lālā o laau ma talai o latou ofu e fola ai le ala o afio atu ai o Ia. O ataata ia o le solo e fa'aalia ai, e i ai le tāua ma le anoa o se feau o aumai e lenei solo, ae maise lē o alalagaina e tagata lona tietie mai i le asini. E i ai ni mafauauga e faapea o le tete'e o Iesu ma i latou e lagolagoina o ia i le malo o Roma, ae leai, o le manatu a ia o tagata, ae le o ni fauuga o faasaga i se tasi. E oo a i le tala sa faitau nei, e le o tautinoina atu e Iesu lona tulaga Mesia i tagata, a'o tagata e alalaga ma faalagi ia, le tusiga o i ai le f (5), o tāua ai o ia o le tupu.

Fanau, o le vaaiga lena o le vaiaso Paia, o lo o valaau mai iā tatou, e fai foi la tatou filifiliga. Po o fea o nei solo e lua o tā'ua, e te agai e lagolago ma faamalō i ai? Ae pe aisea foi? Ioe, o le solo lava lea o afio atu ai lē o tietie i le asini, o le solo lena. Auā o Iesu lena, o lo o agai atu e faataunuu le Taulaga o le Faaolataga mo tatou ma le lalolagi uma.

GALUEGA FAATINO: (Mafauauga fetala'i ma fetu'utu'una'i)

A fai le sisiga fu'a a le Malo o Samoa, e pei ona sa faamanatuina talu ai, tatou te vaaia ai solo a leoleo, solo a aoga ma Matagaluega ma faalapopotoga, e masani foi ona i ai i isi tausaga solo a taavale teuteuina. O fea o solo nei e tolu o iloa ai lo tatou faaeaea i le Atua? Tau mai le mafuaaga o lau tali.

Tali: O le solo a leoleo.
Ona o le solo lea, latou te muamua lava taina le vii o le fu'a, o le faamua lava lea i le Atua o faavae ai Samoa.

PESE: 83 (Vivii atu ia i lo tatou Alii)

A'OA'OGA:

1. Tautino i lou loto faamaoni, o Iesu le tupu.
2. Malaga faatasi ma Iesu i lou loto talitonu.
3. Ia viia le Atua.

.....

ASO SA: 31 MATI 2024 (TOETU)

MATAUPU: O LE OLA INA UA MAVAE LE OLA

SINI: Ia malamalama tamaiti, a mavae le ola i le tino o i ai nei, (o le oti lea) e liua ma avea ma tagata ola faa-le-agaga, pe a faatuatua faamaoni i le Atua.

TUSI FAITAU: I Korinito 15: 50 – 58

FESOASOANI MO FAIAOGA:

O la tatou mataupu o lenei Aso Sa, e le faigofie pe a fua i le uiga ma laasaga masani o le ola ua tatou masani ai. O le ola faa-le-tino o tatou i ai nei, a oo mai le iuga, po o le oti, ona uma loa lea o lo tatou iloa, auā ua leai se isi manava o totoe iā te i tatou. Peitai, o le uiga loloto atu o la tatou mataupu, e faigofie ona tatou malamalama i ai, pe a tatou faamatalaina ma mafaufau loloto i lona itu faa-le-agaga, po o le feso’otaiga ma le Toetu mamalu o Iesu, e pei ona faamanatuina i lenei Aso Sa e le faatuatua, e pei ona taua e Paulo; - “O lē e fai mona tofi le Malo o le Atua, e le o le tagata faa-le-tino, a o le tagata faa-le-agaga.”

O lona uiga – o tagata ola uma o faatuatua faamaoni i le Alii o Iesu, ma usitaia lona finagalo moni, a’o i ai i le ola i le tino nei, a oo ina feoti ma mavae atu le ola nei, ona liua lea e avea ma tagata ola pea i le faa-le-agaga. Lea e tautala i ai le f (51 – 52). “E le momoe tatou uma, o lona uiga e le oti tatou uma, ae liua ma toe tutū mai i latou, sa faatuatua i le ola faa-le-tino, pe a ilia le pu faauma, po o le taimi mulimuli lea.

O lo o faa-faigofie mai e le Aposetolo i lona fai mai, o le tino i’u vale e tatau ona ofu i le tino ola pea; po o le tino oti e tatau ona ofu i le tino le oti lava. O le uiga lenā o tautala i ai le Mataupu o le aso; “O le ola ina ua mavae le ola.” A mavae le ola faa-le-tino nei o le tagata faatuatua, ona avea lea ma tagata ola pea faa-le-agaga, e pei o le upu o tusia; “Ua faaumatia le oti i le manumalo. Le oti e, o fea o i ai lou manumalo? Le oti e, o fea o i ai lou tui?” (f 54b -55). O lenei talitonuga faa-le-faatuatua, e molimau foi i ai le Perofeta o Isaia 25: 8, ma Hosea 13: 14.

Fanau, e tāua tele lo tatou talitonu faamaoni ma faatuatua iā Iesu Keriso lo tatou Alii, a o tatou i ai i le ola nei. Auā a oo mai le iuga

o ō tatou aso, o le a liua tatou ma avea ma tagata ola pea i le Malo o le Atua, o le faa-le-agaga lava lea. O le Toetu Manumalo mai o Iesu mai le oti ma le tuugamau. O le toe tutū faatasi mai lava lea ma i latou uma o momoe i lona suafa. “O le ola ina ua mavae le ola.”

GALUEGA FAATINO: Taliga Fesili:

(Mafaufau loloto faa-mataupu silisili)

1. Ua e vaai i se tagata ola, ina ua mavae le ola? Faamatala auiliili mai le uiga o lau tali pe afai e te Ioe pe Leai foi.

Tali: (i) Leai! Ona e leai se tino o se tagata ola faa-le-agaga (ii) Ioe! E moni e leai se tino faa-le-agaga e vaaia e mata, a’o le tagata o vaaia e mata i le ola lenei lona faatuatua faamaoni i le Alii, o le tagata faaolaina lava lena pe mavae le ola nei.

2. O le a le uiga o le tino iu-vale, o tautala i ai Paulo?

Tali: O le tino faa-le-tino nei.

3. O le a le uiga o le tino le oti lava o fai mai ai Paulo?

Tali: O le tino faa-le-agaga lea.

4. O le a le uiga o le faaupuga a Paulo o i ai i le (f.50) e faapea – “E le mafai ona avea o le Malo o le Atua ma tofi o i latou ua i ai tino aano ma toto?”

Tali: E le fai ma tofi o le tagata faa-le-lalolagi le Malo o le Atua, a’o le tagata faa-le-agaga, e leai se tino aano ma se toto.

5. E tutusa le tino iu-vale, ma le tino oti, pe leai?

Tali: E tutusa, o le tino iu-vale, o le tino faale-tino lava lena e oti.

PESE: 277 (A mavae le ola nei)

A’OA’OGA:

1. Faatuatua i le Alii Toetu.

2. Ia fai le Malo o le Atua ma ō ta tofi.

3. ‘Aua e te tumau i le ola nei.

**MANATU TAIALA O APERILA – ME:
IA FAI PEA TATOU MA VIIGA O LE ATUA**

O le viiga o le mea totino a le Atua, e ala i le soifua fa’aaogaina tatau o le tagata, ma mea uma o le foafoaga, e pei ona ia foafoa ai mea uma lava. Ona o lo tatou olaga nei e gasegofie i le sēsē ma le agasala, o le ala lea e tatau ai ona tatou mataalia pea i taimi uma, ina ia viia pea lona suafa e ala i lo tatou ola talitonu ma faatuatua tumau i le Alii.

ASO SA: 07 APERILA 2024

MATAUPU: O LE AOAIGA A LE TAMĀ

SINI: Ia malamalama tamaiti, o le aoaiga a le Alii, e faigata ae taunuu manuia ai.

TUSI FAITAU: Eperu 12: 3 – 12

FESOASOANI MO FAIAOGA:

O le fuaiupu e 3 – 6, o le tatou tusi faitau, o lo o faamamafa mai ai le tāua o le onosaia o faigata o le ola, e pei ona sa onosaia foi e Iesu, faigata o le tete’e ma le faatu’iese mai o tagata iā Ia. A’o se faatomuaga tāua, o fafagu ai le ola faavaivaigofie, o mafua ai ona paū atu le tagata i le agasala, ma iloa ai lona le tu’uaulafo i apoapoiga faa-tamā a le Alii i le fanau (f 5b-6)

Ua tatou iloa e tusa o le tala, so o se aoaiga lava, e lē taliagofie ma logolelei i le tele o taimi, ona o i ai i ia aoaiga ma vavao, o vaoia ai le manao i mea o naunau ma loto i ai. Ona foliga mai lea, “O le aoaiga”, o se mea e faanoanoa ai, ae le o se mea e maua ai se fiafia. Peitai, o le onosai e usitaia le aoaiga a le Atua, o le aoaiga o le alofa moni ma le tonu mai le Atua, e fua mai i le manuia mulimuli ane. O lo o iloa i le (f.11), o le soifuaga faa-Kerisiano, e tumau i galuega mamafa, e matuā moomia ai lo tatou faautauta ma le onosai, i fatiatamai o faalavelaveina ai lo

tatou ola ususitai i le Alii. Savavali ma tauivi e tete’e atu le agasala, e ala i le fesoasoani mai o le Agaga Paia. O ai lava na te talia le aoaiga, o ia lena o tausia e le Alii. O le aoaiga foi e mo tagata uma lava, o ai na te lē talia, e le o ia o se atalii i le tamā, a’o le tama to i fale o ia. O tatou uma o tagata ola, na soifua mai i o tatou tamā faa-le-lalolagi nei, i latou o aumaia le aoaiga, e tatau ona tatou talia ma usitaia. A’e sili ai le tatau ona tatou usitaia le aoaiga a lo tatou Tamā faa-le-lagi, lea tatou te ola ai.

Fai mai mafaufauga o le isi tagata. O le puipuiga a le moa i lana toloai, e i ai taimi na te solia ai tamai moa o fetuleni atu ia te ia, a’o pisi i ana feau e tele. E le o le mafuaaga ia mamate ai, a’o le faamoemoe ia maua ni mea ai e ola ai. O lo o faatusa foi e Iesu ia lava tulou, o le matuāmoa o tausia lana toloai (Mt 23: 37). A tatou tuu le ata lea i se vaaiga faa-le-lotoi fale o tatou ola ai, o aumai ai se faamanatu tāua; E tatau ona tatou onosaia faigata, o se vaega o le aoaiga na te aumaia manuia o tatou tulimataia.

Fanau, o le faamanatu aogā lea ma tāua a le tatou mataupu mo tatou i lenei Aso Sa. O lo tatou talia o aoaiga a lo tatou Alii, e fua mai i le tatou ola e ava ma usitaia matua e pei foi ona tāua i le tulafono e lima, tatou te manuia ai. O le Taulaga foi na osia e Iesu, o le faailoga o lona usitaia o le finagalo lona Tamā, a’o le faamoemoe ia ola le lalolagi toilalo i le agasala ia te Ia.

GALUEGA FAATINO: (Faalauteleina o le mafaufau)

Tago e toe tusi, pe faamatala auiliili mai i au lava upu, i se faaupuga faigofie, le apoapoiga o i ai i le f.(5-6).

PESE: 246 (O oe o le Atua, Le ...mai)

A’OA’OGA:

1. O atalii o le Atua, e latou te talia lana aoaiga.
2. O aoaiga e manuia ai.
3. O le Atua lo tatou Tamā.

ASO SA: 14 APERILA 2024

MATAUPU: LĒ TAUSISI I FAIGA MASANI

SINI: Ia malamalama, i le tāua o le tausisi pea i faiga masani, e finagalo ai le Atua.

TUSI FAITAU: Kalatia 2: 11 – 21

FESOASOANI MO FAIAOGA:

O Kalatia, o se eleele tele, e le tasi se aai o i ai. O le tusi atu la a Paulo i Kalatia, o lo o faalauaitetele mo nuu uma o i ai le au Kerisiano i Kalatia, e pei o Anetioka i Pisitia (Antioch Pisidia) Ikonio ((Iconium) Lisitia (Lystra) ma Teipi (Derbe). O le ta’u valeina e Paulo o Kalatia e pei ona i ai i le amataga o le Mataupu e 3, e mautinoa e i ai le mea ua faaletonu, lea ua mafua ai ona mamafa upu a le Aposetolo. O la tatou mataupu la o lenei Aso Sa, o lo o atagia ai le mea ua faaletonu, pei ona tāua ai, le lē fiafia o le Aposetolo o Paulo iā Peteru. O lo o tāua mai le tala, o Peteru sa aai faaasi ma tagata Iutaia, ma Paulo ma Kerisiano o nuu ese. O tagata o nuu ese, o tagata e le māmā, e agasala ma le peritomeina i le vaai a tagata Iutaia. Ina ua taunuu mai la tagata Iutaia, e omai mai Ierusalem, le Ekalesia o avea ai le toaina o Iakopo ma taitai; sa faafuasei ona faamavae Peteru ma alu ese. O le mafuaaga o lona alu ese, e lē o tāua i le tala. Peitai, o iloa lelei e Paulo, o le musu o Peteru e molimauina atu ia o aai faatasi ma tagata agasala (nuu ese) auā e faasa i le tulafono faa-Iutaia.

A’o le manatu o Paulo, e sēsē le mea ua fai e Peteru, o le ola faafoliga ma le fia teuteu lumafale i le vaaiga a tagata le mea ua ia fai nei. O le manatu o Paulo, e lē ola se isi i le tausiga o le tulafono, ae ola i le faatuatua iā Iesu Keriso. E lē o ta’uleagaina la e Paulo le tulafono, leai; o le mea lelei, e aogā e puipuia, ma lima taitaiina ai le tagata mai le paū atu i le agasala, a’e le tauamiotonuina ai, pe faaolaina ai se isi. O le faaolataga lava ia,

o le mea foai fua mai e Iesu Keriso mo so o se tagata e faatuatua faamaoni ia te Ia, le afaina pe Iutaia, po o le tagata o nuu ese. Ua fefe Peteru i le tulafono faa-Iutaia; ae tu’u ai le mea tatau, o le avanoa e mafuta ma faasoa ai ma tagata uma e uiga iā Iesu. O le mea faigata, ona o lea ua tosoaina atu ai ma isi tagata i le mea a Peteru ua fai nei, atoa ma Panapa ua aafia atu ai foi. I le ma lenei, o lo’o tautino lava e Peteru i lana lauga o i ai i le Galuega 10: 34 – 35, “E moni ua na iloa, e le faailogaina tagata e le Atua, ae o le mata’u ma le amiotonu, e talia e Ia. ‘Aua le tuua fua le mea lelei o fai, ona o le fefe i le tulafono. O le Taulaga faaola foi na faia e Iesu, e le’i faailogaina nisi e agavaa i ai, leai, e avanoa tagata uma i ai ae faaolaina pe a talia i le faatuatua faamaoni ia Ia.

GALUEGA FAATINO: Taliga Fesili: Fa’aaoga le Tusi Paia, atoa mo lou malamalama i le tala sa faamatala atu)

1. O le a le mea moni lava na tupu, na mafua ai ona lē fiafia Paulo iā Peteru?
Tali: O lo o faamatalaina mai i le f (12)
2. O le au peritomeina o tā’ua i le tala, o ai ia tagata?
Tali: O tagata Iutaia. Auā o le tasi lea a latou tu masani, e tausi o se tulafono, o le Peritomeina
3. O le a le amio faa-nuu-ese ua fai e Kefa, e pei ona tāua i le f.14b?
Tali: O le amio pepelo, po o le femoumoua’i, ua tusa ai o ia ma tagata o nuu ese e pei ona latou fai mai, o tagata agasala tagata o nuu ese.
4. O ai lea e taua i le f (20), na faasatauro faatasi ma Keriso?
Tali: O Paulo.

5. O le a le uiga moni o le f (21)?
 Tali: O lo’o tautino ai e Paulo; o le Alofa Tunoa o le Atua, o le maliu lava lea ma le Toetu manumalo o Keriso, mo tagata uma ia ola, e pei foi o ia. O le ala lena o lona talia atoatoa i le talitonu ma le faatuatua; auā ana faaolaina tagata i le tausia o tulafono, e leai lava se uiga o le maliu o Iesu.

PESE: 384 (E fiafia i le tala ia Iesu)

A’OA’OGA:

1. O tulafono e faatonu ai le ola.
2. O le faatuatua e ola ai e faavavau.
3. ‘Aua le faailoga tagata, aua e agasala tagata uma.

.....

ASO SA: 21 APERILA 2024

MATAUPU: O LE ALA I LOU LAVA
 FAALEAGAINA

SINI: Ia malamalama tamaiti, o le loto leaga ma le le māmā, o le ala lava lea i le malaia.

TUSI FAITAU: I Samuelu 17: 54 – 18: 16

FESOASOANI MO FAIAOGA:

O le tala sa faitau nei, o se vaega o le talaaga umi o le nofoaiga a Saulo a’o avea ma tupu o Isaraelu. O le uma o le taua i le va o Filisitia ma Isaraelu, ma ua fasiotia Koliata le toa tautaua o Filisitia, o le tagata tino ese toe matautia, sa faigata ona faatoilaloina e se tasi. Ona o Tavita o le tagata e au pea ma le Atua, e lei faigata ai ia te ia, ona ia fasiotia lea toa. Ua oti

Koliata, ona saili lea e Saulo se tupuaga o Tavita, ae na ia tau atu i ai, o ia o le atalii o Iese lana auaua mai Peteleema. Ona taofi lea e Saulo Tavita e le’i toe tuuina atu e alu i lona aiga. Sa faautauta foi Tavita i mea uma e auina i ai o ia e le tupu. O le mafutaga lea na osia ai loa e Ionatana le atalii o Saulo, ma Tavita le feagaiga o le alofa faamaoni, auā na alofa Ionatana iā Tavita; e pei ona ia alofa iā ia lava. Na ia foai atu foi lona ofu talaloo, ma ana mea uma tau le perenise o le malo mo ia.

O le foi mai o Tavita ma le au tau mai le fasiotiga o Koliata, na faapotopoto ane ai loa fafine mai aai eseese, ua latou usu pese, ma sisiva e faatali ai le tupu ma le itu-taua ua foi manuia mai. Sa latou lagi fetalia’i pese fai mai – Ua fasia e Saulo ana toa afe, a’o Tavita, o ana sefulu o afe. E ui o lo’o sa’o lava le agaga o pesega, ona ua fasiotia e Tavita le toa tautaua, sa fai ma faamata’u iā Isaraelu; a’o iinā tonu na faapogai mai ai le ita o le tupu, o lona manatu, ua toetoe lava ave uma e Tavita le malo. Ua ia manatu foi ua sili Tavita i tagata nai lo ia. Sa i ai pea Tavita i le maota, e ta le laau ma pese e faafiafia ai le tupu i le tele o aso, a’o Saulo, ua le mapu lona lamalama, ma fafau se mea e oti ai Tavita. A’o ta e Tavita le laau i le tasi aso, a ua leaga tele le loto o le tupu, na ia veloina ai Tavita i le tao, ma fai ane – “Ou te fasi iā Tavita ia tuilua ma le pa o le fale,” e le’i lavea Tavita, auā sa ia iloa ma alo ai. E ui e le’i oo le tala i lona iuga, ae ua tatou iloa le leaga o le iuga na oo i ai Saulo, na toe oti lava ia i lana pelu i le taua, lea e atoa ai la tatou mataupu o le aso, “O le ala i lou lava faaleagaina”

Fanau, o le feau lena mo tatou, o le a le mea lelei ua fai e le isi, lagona le faafetai i lenā tagata. Ae ‘aua le ita fua i ai ma lamalama, nei toe i’u mai iā tatou le leaga. Tiga le alofa ma le lelei o Iesu, sa tu’uaia lava e tagata. A’o le agasala tulaia lea a le lalolagi, na toe osi lava e Iesu le Taulaga e mamā ai, e ala i lona maliu ma lona toe soifua mai manumalo.

GALUEGA FAATINO:

(Taliga Fesili – Fa’aaoga lau Tusi Paia)

1. O le a le mafuaga o le ita o Saulo iā Tavita?
Tali: Ina ua faalogo atu i pese fetalia'i a fafine o Isaraelu, pei ua sili atu Taivta iā ia.
2. E i ai se sao o Ionatana i le ita tele o lona tamā iā Tavita, pe a e fua iai i le tala?
Tali: Ioe, ua saga faaopoopo ai le ita o Saulo, talu ai le feagaiga o le alofa faamaoni a Tavita ma lona atalii.
3. O le fuaiupu e fia, o i ai upu o lo'o manino mai ai le ita tele o Saulo.
Tali: (f.8)
4. Aisea na fefe ai Saulo iā Tavita?
Tali: E le gata sa iā Tavita le Atua, ae sa matuā faautauta o ia i mea uma.
5. O le a sou manatu i le tofiga o Tavita e Saulo o i ai i le f (13)?
Tali: Ona o lo o saili pea e le tupu se ala e fasiotia ai Tavita, manatu foi, o le ala lea o lana tofiga ia avea ma ala e ita mai nisi tagata ma tete'e iā Tavita.

PESE: 222 (Aue loto ua leaga...)

A'OA'OGA:

1. E tuliloaina le tagata i lana mea e fai.
2. O le loto māmā, o afio ai le Atua.
3. E iloagofie tagata o le Atua, i a latou amio.

.....

ASO SA: 28 APERILA 2024

MATAUPU: O MEA TĀUA MO LE TU'UGA

SINI: Ia malamalama tamaiti, o le saoloto mai le agasala, e sili ona tāua mo le ola o fai nei.

TUSI FAITAU: I Timoteo 6: 1 – 10

FESOASOANI MO FAIAOGA:

Mo le faigofie o le faamatalaina o la tatou mataupu o lenei Aso Sa; O le “tu’uga” o i ai le autū, o lo’o faasino i le “soifuaga” po “o le ola o tatou i ai nei”; a’o “mea taua” o lona uiga “o mea tonu ma tatau ona tatou fai e ola ai.”

O le amataga la o la tatou tusi faitau, o lo’o agai i le va o le matai ma le pologa. O le a le mea e tonu – ona fai e le matai i lona tulaga faa-matai, a’o le a foi le mea e tatau ona fai e le pologa. E tele le va po o le eseese, pe a faatāua aganuu, ma le vaai faa-le-tulafono i le olaga masani. [Mafaufau i sā ma tapu e tusa o la tatou aganuu faa-Samoa]. A’o le aganuu a Paulo fai mai, o tatou o Kerisino, o matai ma pologa e tutusa faa-le-agaga; o uso ma tuafafine iā Keriso. O la Paulo o i ai i le Kalatia 3: 27 – 28, “Na papatisoina uma iā Iesu Keriso, ua o’ofu uma foi iā Keriso, e lē toe eseese, auā ua tasi lava outou uma iā Keriso. E lē o tete’e Paulo i aiaiga faavae o matai ma pologa, i atunuu o faia ia aganuu. A’o lona manatu o avatu, o ni taijala mo matai Kerisiano ma pologa Kerisiano. O le fesagaina lea i le manatu o Paulo, e pei lava o le va o le faigaluega ma le ē ana le galuega. E tatau i le faigaluega ona galue malosi, ma fa’aalia lona fa’aaloalo ma lona amanaia o lona matai. I le tali mai foi a lē e ana le galuega, e tatau ona fetau ma paleni (Efeso 6: 5 – 9) (Kolose 3: 22 – 25). O galuega ia iloa mai ai le faatuatua ma le alolofa iā Keriso. O le faatomuaga atoa lea i le f (1 - 2), o le ata lautele mo tagata uma i le va nonofo ai, a’e sili foi mo Timoteo, i lona tulaga o le auauna a Keriso lona matai. I le f (3-5), o le timaiga i lona atalii faa-le-agaga o Timoteo, a’e mo le au-faigaluega uma foi. ‘Aua nei pei o ē na ona fia o ē talai ona o le

fia maua o tupe. E i ai foi tagata latou te le fia iloa ma talia le tala moni iā Keriso, e le fia auai ai foi i le Ekalesia, a’e na ona latou taumafai e faatupu le vevesi o le Ekalesia. E le o le iloa o le mataupu silisili, e manatu ai, o ia ua sili i isi tagata, pe avea ma ala e sue ai tupe, leai! Ona ta aofai mai lea i le f (6), e pei o le key lena mo le ola faa-le-agaga, ma le taunuuga lelei e oo i ai. E tatau ona faaeaea tagata uma i le Atua, ma totonugalemu ia te Ia o tatou manao (Mataio 6: 33). E tatau foi ona tatou talia mea o faia e le Atua i lo tatou ola (Filipi 4: 11 – 13).

O le faaiuga mai le f (7 – 10), o tāua ai e Paulo le o’a ma le tamaoaiga (tupe), pei o le mafuaaga autu lea o le mana’o, o mafua ai ona lē mafai na tausia le va-nonofu lelei ai o Kerisiano. Ae a iloa e le tagata, e le’i sau ma se mea e tasi i le lalolagi, a toe alu foi, e leai se mea e mafai ona alu ma ia; ona faigofie lea ona malie lona loto, i mea na te maua a’o ola auā e le o ni ana mea. E taua tupe, a’o le “mea autu” o mafua ai le leaga, ma le mafai ai ona nofo fealofani i le ola o fai nei, “o le mana’o”. O le mana’o tele e faaosoosoina ai, e maileia ai, e tuinanau ai foi, ae malaia ai le tagata. ‘Aua le faapologaina tatou e o tatou manao; ‘aua foi tatou te mananao tele, ona o lo tatou fia sili. Ae ia avea tatou uma ma pologa a le Alii, tatou te filemu moni ai, ma savavali i lana amiotonu,

Fanau, ia fai i tatou ma pologa a le Alii e ala i lo tatou faia lona finagalo, tatou te manuia ai. O Iesu foi, sa fai o ia ma pologa ona o a tatou agasala, ina ia tatou maua le ola, ma maua atili ai lava, e ala i le faatuatua iā te Ia, ma le faaolataga sa Ia faia.

GALUEGA FAATINO: (Mafaufauga fetala’i)

Tusi mai ni tāua sili, po’o ni lagona tāua, e te manatu e tatau ona e ola ai, ina ia avea ai oe ma pologa a Keriso, a’e e te iloa e i’u i le manuia.

PESE: 219 (E manuia lava, o e talia lelei)

A’OA’OGA:

1. E leaga le mana’o tele ona o le fia sili.
2. E tutusa tagata uma iā Keriso.
3. Ola o oe o le pologa a Keriso e manuia ai.

.....

ASO SA: 05 ME 2024

MATAUPU: UA FAAMAUTŪ LE AIGA O IOSEFA I AIKUPITO

SINI: Ia malamalama tamaiti, i le matalasi o faiga a le Atua i lo tatou ola o fai nei.

TUSI FAITAU: Kenese 47: 1 – 12

FESOASOANI MO FAIAOGA:

O le tala lenei, o aumai ai se tasi o vaaiga sili ona tāua i totonu o le Tusi Paia, e uiga i le lautele ma le aoao o le silasila alofa a le Atua i le tagata ma lana o fai. Ua tatou iloa i tala o le Tusi Paia, e matuā faigata lava ona avea Farao ma se tasi, e i totonu o le taupulega a le Atua. A’o le tala sa tatou faitauina, o lo’o matuā matilatila ai le taimi o le alofa o Farao i le aiga o Iosefa i lona agaga talimalo ma lona loto fiafia, o se laasaga tāua i le atinaeina o tagata o le aiga o le Atua. Fai mai Farao i le talosaga a Iosefa ma ona uso i se avanoa e nonofo ai i lona nuu; “Iosefa, o lo o i ou luma le laueleele uma o Aikupito, ave i ai lou tamā ma ou uso e nonofo ai i le laueleele e sili ona lelei, o Kosena lea.” Afai foi e i ai nisi o ou uso e te iloa e sili ona malolosi, ia e tofia i latou e fai ma leoleo-sili i lafu manu a Farao. Ua tatou iloa iinei le matalasi ma le silisiliese o galuega a le mana alofa o le Atua e pei ona fa’aalia i le finagalo agalelei o Farao. Ae a fai foi, o le afuaga o le agalelei o Farao, ona o Iosefa lea la te

fetāpai i mea fai ma taupulega o le malo; o lea lava ua tatou iloa o le Atua alofa lava o lo’o i tua o ia lavasiga uma. Auā ua tatou iloa, a’o i ai Iosefa i le lua na lafo i ai e ona uso, ma le falepuipui na loka ai e Potifara le auaina sili a Farao, sa taumate lona toe mafai ona tulai mai. Peitai, ua tatou iloa lona faatuatua mausali i le Atua, ma le poto na ave i ai e le Atua, na te faamatala ai miti ma mea lilo, lea lava na faaeaina ai e le Atua i le nuu ua nofomau ai nei o Aikuptio. Fai mai Iosefa i le Kenese 45: 5, “... auā na auina mai a’u e le Atua e muamua e fai ma faaola ia te outou.” Ona faamanuia lea o Iakopo le tamā ia Farao, ona ave ai lea o latou uma e nonofo i le nuu e sili ona lelei o Ramese. Ona tausia ai lea e Iosefa lona tamā, ma ona uso, ma le aiga atoa, e oo lava i tamaiti.

Fanau, o ā lava taiga o le ola o tatou i ai, o le mea tāua; ia mau pea le loto faatuatua i le Atua. Auā e mafai e lou faatuatua faamaoni, ona liliuina nisi e lē iloa le Alii, ma lavea’iina foi ou lava totino moni, sa leiloloa ua toe sulu atu iā oe. O Iesu Keriso foi lo tatou Alii, e matuitui ma faigata ala sa ia savalia, lea lava na oo i le satauro, maliu ma tanumia, ae na toe soifua mai i le manumalo, ua fai o Ia ma o tatou aiga, tatou te faamautu i ai, i le faatuatua faamaoni.

GALUEGA FAATINO: (Taaloga faa-le-mafaufau e fua i le tala) (Faitau lau Tusi Paia, ma fua i ai lau tali i nai fesili o i lalo)

1. Afai e tutusa le salamō ma le faatuatua, o ai la le toalua lena o iloa i le tala?
Tali: (i) Faatuatua – Iosefa (ii) Salamo – Farao
2. Afai e 80% Iosefa e fia la Farao?
Tali: E 80% foi.
3. Afai e tai 80% Iosefa ma Farao, o le a la sou silafia, e fia pasene o le Atua?
Tali: E 100% ma sili atu le Atua.

4. O le a le pogai ua ave ai pasene na i le Atua e tusa o lau tali i le Numera 3?
Tali: Ona o le Atua e atoatoa e leai sona sese e 100% lava le Atua i taimi uma ma sili atu.
5. E i ai se tagata o tāua i le tala e ono atoa se 100% o lona olaga lelei?
Tali: E leai, e le mafai lava e se lelei silisili i le lalolagi lenei, ona 100% e tusa ma le Atua.

PESE: 266 (Tatou te le tumau iinei) [fati 265]

A’OA’OGA:

1. Ia pule agalelei pei o Farao.
2. Ia faatuatua e pei o Iosefa.
3. O lo tatou aiga mautu le Atua e faavavau.

.....

ASO SA: 12 ME 2024

MATAUPU: FAATELĒ LOU FATU

SINI: Ia malamalama tamaiti, o le tagata e telē le fatu, e tumau lava i le Alii, lē afaina po o a faigata.

TUSI FAITAU: Mareko 7: 24 – 30

FESOASOANI MO FAIAOGA:

O le galuega a Iesu e mo tagata uma lava, e muamua i Iutaia, ona faasolo ai lea i nuu ese. O lea la ua tu’ua Kalilaia, ae ua ave e Iesu ona soo ma latou agai atu i Turo ma Saitonu. O aai tetele i Foinie, le mea sa ia faamaloloina ai le tama teine a le fafine o

nuu ese. O Turo sa fefaauoa'i lava ma Isaraelu i taimi o Tavita (II Samuelu 5: 11), ae na vave ona liliu ma avea ma aai o le leaga ma le agasala, e oo lava i lo latou tupu, fai mai o ia o le Atua (Esekielu 28: 1[ff]). Sa fiafia tele Turo ina ua lepetia le malumalu i Ierusalemā i le 586BC, auā ua leai se nuu la te tauvā, ma ua alu a'e i luga lona tamaoai ma faateleina ana oloa o fefaatauaiga. O le parakalafa o muamua atu mai la tatou tusi faitau, o faataua ai e Iesu le mea e sau mai totonu i le loto, e iloa ai le ituaiga tagata. O lona faamamafa, o le loto māmā lea, ma agai atu ai loa i nuu ese, o se faamamafa tāua tele. Auā o la tatou tala sa faitau nei, o lo o amata lava i le augani ane a le fafine Foinie iā Iesu, mo se fesoasoani mo lana tama, ua ulutinoina e temoni. E ui ua fai le fafine ma faalavelave, a'o fia mapu le Alii, na te le'o manaomia nisi, a'o le feumiaiga lea o tatou iloa tino mai ai, le telē o le fatu o lenei fafine, e iloa i le mea o sau mai totonu o lona loto. Auā o le upu a Iesu, o ia faatusa ai le fafine i le maile, (ulī) ua le o se mea lea e tigā ma afaina ai lona loto. Pau le mea o ia tuliloa, pe avea lava ia ma faalavelave i le Alii, ae tumau pea i le mea o i ai lona talitonuga, o Iesu lea; seia iu lava ina ia maua le faamalologa a le Alii mo lana tama.

Fanau, e le'o ituaso uma tatou te feagai ai ma lo tatou Alii e solo lelei pea; e tele taimi tatou te vaai ai i le finagalo o le Alii, e fete'enai ma lo tatou iloa, ma tupu ai lo tatou le fiafia. A'o le a'oa'oga mai le tinā Foinie, 'aua tatou te amanaia fua upu a le Alii, afai lava o Iesu le alofa faamaoni, o le faaola foi; tumau ai i le Alii, faatelē lou loto, e iu i le tauia o lou onosai ma lou faatuatua. O Iesu Keriso sa fetai ai ma le upuvale, o le po, o le feanu, ma le tele o mea matuitui sa oo iā Ia, a'e maise lona amusia e tagata. A'e sa tumau faamaoni i lona Tamā, le na toe faatūina o Ia mai le oti, ina ia ola le lalolagi uma, pe a salamō ma faatuatua.

GALUEGA FAATINO:

Tali mai i le “Sa’o” po o le “Sese”

1. E le o se mea matuiā i le fafine le ta'u maileina o ia e Iesu.
Tali: Sa'o
2. Ana ita le fafine iā Iesu, semanu e fai se finauga ma le Alii.
Tali: Sa'o
3. O Turo ma Saitonu e lavea i le faitauga o nuu ese, ae le o ni nuu o Isaraelu.
Tali: Sa'o
4. Ua ola le tama a le fafine, ona o Iesu, a'e le ona o sona faatuatua.
Tali: Sese (Na faaola e Iesu ona o le faatuattua o le fafine)
5. Ana le alu Iesu i le fale o le teine, semanū e le ola.
Tali: Sese. E le'i alu Iesu, na o le fafine na auina e Iesu i le fale.

PESE: 119 (Ina faafofoga mai ia ...”

A’OA’OGA:

1. Faatelē lou fatu, pe a fia fai manuia o le Atua.
2. Faamaoni ma tumau i le Alii.
3. O le Atua e alofa i tagata uma.

.....

ASO SA: 26 ME 2024

MATAUPU: TŌTŌ I TAFATAFA O VAITAFE

SINI: Ia malamalama tamaiti, e ola manuia ma fua tele mai i mea lelei, le tagata amiotonu ma faia le finagalo o le Atua.

TUSI FAITAU: Salamo 1: 1 – 6

FESOASOANI MO FAIAOGA:

O le uluai pese lea, po o le Salamo muamua i le tusiga atoa o Salamo e i ai i le Tusi Paia, o lo’o faaulutalaina mai e faapea: “O le manuia o lē ua amiotonu ma le malaia o lē ua amioleaga.” Ua tatou iloa, so’o se laau lava e ola i auvai, po’o tafatafa ane o vaitafe, e ese le ola laulauā, ola lelei, ma fua tele mai foi i taimi o fuata. O le talitonuga, e mafua ona o faasūsūina pea ona a’a e le vai i aso uma ma e le faigofie ona mago pe mate foi, i vaitau o le vevela ma le malosi o mūgalā.

O lo’o faatusa ai la e le fai-Salamo, po o le fatupese i lenei pese, tagata e pei o laau ia, i latou ua naunau e tausi, ma mulimuli faamaoni i tulafono a le Atua, po’o lana upu, e pei ona tā’ua i le f (2). Faasolosolo ifo i lalo le faitau i le f 3(ff), o le ata manaia ma le matagofie lena o le laau po’o le tagata, e tumau pea i le Upu a le Atua, po’o ana Afioga, e faasūsūina ai pea lona loto, ma fua tele mai ai pea i mea lelei na te fai. O lo’o ta’u mai ai ma le eseesega, o le laau e le ola i tafatafa o le vaitafe, po’o le tagata e le tausi i Afioga a le Atua, o lo’o faatusa i tagata amio leaga, o le aputi e leleagofie i le matagi, o le laau foi e le fua lelei ma vave mate. Ona a oo mai le aso faamasino o tagata taitoatasi uma, e iloagofie le tagata e tausi i Afioga a le Atua, ma le tagata agasala ma amio leaga. O le tāua lea o lo tatou toaaga e faitau le Tusi Paia, ma ia goto ifo i o tatou loto ma lagona ana Afioga e suia ai i tatou, mo mea lelei ma fua tele mai i le viiga o lona suafa. E pei ona mitiia e laau le vai mai vaitafe, e ao foi ona tatou mitiia le Afioga a le Atua, e tumau ai le lanulauava o ō tatou loto, ma tauluola ai lo tatou faatuatua.

O le toto o Keriso, ua faasūsūina ai le loto maa’a ma le agasala o le lalolagi, ina ia salamō ma avea ma tagata faaolaina, e ala i le talitonu ma le faatuatua iā te Ia.

GALUEGA FAATINO: Tusiga Solo

Tusi sau solo, e 4 laina i le fuaiupu, ae 3 fuaiupu. O le solo e faatatau i le tagata lelei, e pei o le laau lauolaola i tafatafa o le vaitafe.

PESE: 115 (Pei o le ua e susu ai)

A’OA’OGA:

1. E tupu ma ola lelei le tagata o le Atua.
2. Inu i le Agaga mana o le Atua e malosi ai.
3. Avea oe ma laau fua tele mo le galuega a le Atua.

.....

MANATU TAIALA O IUNI: O LE MALO O LE ATUA

O le malo o le Atua, o le malo o agaga o tagata ua latou savavali ma faia le finagalo o le Atua i aso uma o latou olaga. Auā na faia e le Atua le tagata i lona faatusa ma Ia manavaina i ai le manava ola, ona ola ai lava lea o le tagata ma le faamoemoe, ia ola faapaiaina, ma faalogo ma usitai i lona finagalo. O lona finagalo maualuluga, ia maua’a le ola mafuta, ma ia maia ee le tagata ona manuia i aso uma.

ASO SA: 02 IUNI 2024

MATAUPU: E PAIA LE ATUA

SINI: Ia malamalama le vasega e paia le Atua i taimi uma.

TUSI FAITAU: Esoto 19: 1 – 25

FESOASOANI MO FAIAOGA:

O le tusi faitau o le tatou mataupu i lenei taeao ua matuā pupula mai ai ma manino mai ai o le natura lava lea o le Atua mai le amataga o le foafoaga o lona paia ma lona mamalu lea. E paia le Atua e faavavau. O le filifilia e le Atua o Israelu o lona vavaeeseina lea o latou mai i isi tagata, e fai ma ona nuu ma ona tagata.

Ua poloaiga e le Atua lana auauna o Mose, e ta’u ma faamanatu ia Israelu mai luga o le tumutumu o le mauga o Sinai. Ua fetalai mai ai le Atua, ua outou vaavaai i mea na ou faia ia Aikupito, na ou faaumatia ai le tele o ola o ona tagata ona o outou. Na ou tauaveina outou i apaau o aeto ma aumaia outou ia te au. Afai tou te faalogo ma ususitai mai ia te a’u i lau feagaiga ona fai lea outou ma o’u nuu ua vavaeeseina mai malo uma o le lalolagi, e ui ina e ou e a’u le atulaulau uma. E avea outou ma oloa taua mo a’u. O outou mo a’u, o le malo o ositaulaga ma le paia uma lava.

O le mea lea ia e faatonu ma ta’u atu poloaiga uma nei, ia latou faalogo ma usitai i ai ina ia ola i latou, ae le faaumatia. Ia e faamamāina tagata uma, mai i o latou leaga uma ma faapaiaina i latou i aso e tolu, auā o le aso lea ou te afio ifo ai i lalo le tumutumu o le mauga o Sinai, mo le feagaiga osi ma outou. Ia e faia foi se tuaoi mo le nuu faasiosioina ai le vae mauga, ma fai atu nei outou o a’e, ina papa’i atu i ona vae mauga, e matuā oti lava i latou. O le apoapoiga ua lapataia ai le nuu o le mauga o Sinai atoa, o le ā matuā paia lava, o le afioaga lea, e fetalai mai ai le Atua iā Mose, a’o faalogologo le nuu i le tolaulauina mai o ana tulafono, e faapaiaina ai lona nuu.

Ua oo i le aso tolu ona afio ifo ai lea o le Atua mai le lagi lona afioaga, i lalo o le tumutumu o le mauga o Sinai. Ua fai le mauga o Sinai ma afioaga o le Atua i le lalolagi.

O lona afioaga ua silisili ona maualuga, ona paia i lo afioaga uma, o tupu o malo o le lalolagi. Ua paia le mauga o Sinai mai

lona tumutumu e oo ifo i ona vae mauga. Ua aumaia e Mose le nuu o Israelu ai le togalauapi ma laulaututu i lalo o le mauga.

O le mauga o Sinai ua pusa atoa, auā na afio ifo le Atua i le afi, o le asu ua pei o se umu. O le leo o le pu ua alualu ona tele lava ma ua luluina le mauga atoa. Ua tautala atu Mose i le Alii le Atua, ona talia mai lea i lona siufofoga. Ua afio ifo le Alii i le tumutumu o le mauga o Sinai, ua valaau foi ia Mose e alu a’e i le tumutumu o le mauga. Ua alu a’e Mose i le Atua, ia alu atu i tagata Israelu ma fai atu, nei latou i sofaia mai le mauga e fia maimoa i le Alii ona oti ai lea. Ona tali atu lea o Mose i le Alii le Atua, e le mafai e le nuu ona a’e mai i le mauga o Sinai, auā na e fetalai mai, ia fai se tuaoi ma ia faasā le mauga mo i matou. Ua laulaututu le nuu o Israelu i lalo o le mauga, ma vaavaai ma le gatete ma le fefe i le fa’aali mai o le matautia o le paia ma le mamalu o le Atua. Ua latou matamata i le tumutumu o le mauga i le afi ma le asu ua puaoa e pei o se umu, o le pu ua alualu lona leo, o le mauga atoa ua luluina e se mafuie. O le siufofoga ua faalogo i ai, a e le iloa atu fofoga o le Alii le Atua.

Ua fetalai mai le Atua ia Mose, o lau lauga lava lea i le tolaulauina o tulafono, e faapaiaina ai Israelu uma. Ua faailoa mai ai foi ia Israelu, o Mose lava lo latou taitai, ua na o ia lava la te faafesagai ma tautala ma Ia le Atua, a o faalogologo le nuu. Ua alu a’e Mose i le tumutumu o le mauga ma alu ifo, a o le Atua ua afio ifo mai le lagi i le tumutumu o le mauga o Sinai. O le faailoga o le alofa tunoa o le Atua, mo tagata o le lalolagi, ua afio ifo ai ma lona paia ma lona mamalu ina ia fanaufouina ma faaolaina ia te Ia.

O le feiloaiga foi lenei, o le amataga lea o le ola tapuai o Israelu ia te Ia le Atua. Ia paia ma mamā tagata uma mai le leaga, ona maua lea o le mamalu o le alofa tunoa o le Atua.

O le tali la a Israelu i le finagalo o le Atua, ia latou talia, ina ia fai i latou ma oloa taua ma oo ai i taunuuga manuia. Ia latou faalogo ma usitai i aso uma, ona fai lea o i latou o e olioli ma fiasia i ai le Atua. O le uiga foi lea o le tatou Ekalesia uma ma ana tapuaiga. Ia faapaiaina i tatou i taimi uma, ina ia mafai ona tatou o atu i le tapuaiga, ua faapaiaina ma faamamaina o tatou

loto mai leaga uma, ona tatou maua mai lea ia te Ia le olioli ma le fiafia moni.

O Iesu Keriso ua afio mai, e faailoa mai ia i tatou le ola faapaia moni i aso uma o lona soifua, na oo lava i le satauro o tumau ma mausali lona soifua faapaiaina. O lona toe tu mamalu ua ia faailoa mai ia i tatou le ola ia faapaiaina i aso uma. O le a'oaoga lea mo i tatou, o le ola e paia o le faatinoga lea o le faalogo ma usitai ma faia mea lelei i aso uma. Ia manuia le Aso Sa.

Uiga o Upu ma Fuaitau:

- i) faapaiaina - ia faaumatia mea leaga i totonu o le loto, a ia ola i mea lelei ma le mama.
- ii) aso i ē lua - aso e taunuu ai fuafuaga e fia faia
- iii) faasiosioina - liolioina
- iv) 'aua nei papai - 'aua le tago se lima, pe laasia e vae.
- v) faalevaleva - faaumiumi
- vi) fetaiiai - feiloai
- vii) sofaia - ulufale faia malosi

GALUEGA FAATINO:

O upu nei o lo o faamatalaina mai ai le matautia o le Atua i lona afio ifo i luga o le tumutumu o le mauga o Sinai.

1. Ua i luga o le mauga o faititili, ma uila ma ao uliuli.
2. O le leo o le pu ua matuā tele lava.
3. O le mauga ua pusa atoa, auā na afio ifo ai le Alii i le afi.
4. Ua luluteleina le mauga atoa.
5. O le leo o le pu ua alualu ona tele lava.

Ia e tusi i se card po o se pepa, faaupuga nei ma saesae ona tuu i totonu o se pusa. Ona fai atu lea i ni tamaiti se toalima e o atu e piki le pepa a le tamaiti ma faamatala mai lona iloa i le

mafuaaga ua tulaga matautia ai le Atua i luga o le tumutumu o le mauga o Sinai, ina ua afio ifo e feiloai ma Isaraelu.

PESE: Pese ma Viiga 11

A'OA'OGA:

1. Ia amio lelei i taimi uma.
2. Ia tapuai ma le loto mama.
3. Ia fiafia i le ola faapaiaina.

ASO SA: 09 IUNI 2024

MATAUPU: ALA I LE MALO O LE LAGI

SINI: Ia malamalama le vasega, o le ola i le amiotonu, e tau atu ai i le malo o le lagi.

TUSI FAITAU: Mataio 6: 25 – 33

FESOASOANI MO FAIAOGA:

O le tatou mataupu i lenei taeao, o se vaega o le lauga a Iesu i luga o le mauga, e pei ona faamauina e le Evagelia a Mataio. O le autu o le vaega lea o le lauga a Iesu, "Ia sa'o ma tonu le sailiga a le tagata i le ala i le Malo o le lagi.

Ua fa'aaoga ai e Iesu o mea o le foafoaga e aumai ai lana feau i lona ausoo, ma le motu o tagata. O mea uma lava o le foafoaga ua faia o lo o i ai le ola, o lo o faalagolago ma faamoemoe i le Atua i lo latou ola manuia ma le ola solo lelei i aso uma. Ua na o le tagata lava, ua tuu i ai e le Atua, lana filifiliga saoloto mo lona manuia po o lona faaumatia.

O le mea ua mautinoa, ua toetoe lava tagata uma, ua latou faalagolago, ma faamoemoe i le ola ma le tamaoaiga ma le potu

ua maua mai i le lalolagi, ua fai mo latou atua. Ua latou lafoai le Atua o le puna o le ola, ma le mafuaaga o mea uma o i lalolagi.

Ua fetalai sa’o mai Iesu, o mea ia o lo o outou sailia i le lalolagi, tou te maua lava, e faaopoopo ia te outou, pe afai lea tou te matuā filifiliga e saili ma outou maua le Malo o le lagi ma lana amiotonu. O le faamoemoe lea o le Atua mo tagata uma, e pei ona fai mai ai le 1 Timoteo 4: 8 Auā e aoga foi le faamasani i la le tino, a o le amio Atua e aogā lea i mea uma lava, o lo o i ai le mea ua folafolaina mai i la le olaga nei atoa ma le atali.

O Solomona na fesili i le Atua e fia maua le atamai ma le potu, ua la maua faatasi ai ma isi mea tele ua faaopoopo i ai. O le ala tonu ma le sa’o ua faailoa mai e Iesu i lana lauga i luga o le mauga, e maua ai le faamalieina o le loto ma le filemu moni, o le saili muamua o le malo o le lagi ma lana amiotonu.

A o i ai outou i le taeao o lo outou talavou ia outou mautinoa o le ala lea e faamalieina outou i mea lelei uma mai le Atua. Ia teu loto lo tatou taunuuga manuia o le Malo o le lagi o lo o afio ai le Atua Soifua faavavau.

Ua fetalai mai lava Iesu, e pei ona faamauiina Ioane 14: 6 “O a’u nei le ala ma le upu moni ma le ola, e le alu atu lava se tasi i le Tama, pe a le ui mai ia te a’u.” O le ala sa’o lea ma le tonu e tatou te ui ai, e taunuu ai i le malo o le lagi. E le mafai e lou popole ia maua le tamaoaiga, tulaga maualuga ma aloaia, ona faamalieina lou loto i mea lelei. Ua na o Iesu ma lona soifua a’oa’o mai, ia ulufale i loto ona maua lea o le loto malie, O le amataga o le lauga a Iesu i luga o le mauga o lo o tomua i ana fa’aamuia e valu e pei ona faamauiina i le Mataio 5: 3 – 6. O i latou ua sa’o ma tonu ala ua latou filifilia e taunuu atu i manuia o le Malo o le lagi.

O Iesu Keriso le Alo o le Atua, ua afio mai i le lalolagi e faailoa mai i tagata o le lalolagi le ala tonu e tau atu i manuia o le Atua, i lona Malo o i le lagi. Na Ia le fa’aaogaina lona tulaga pule i mea uma ua faia, a o le ala maulalo e taunuu i le satauro na ia filifilia, ona ia faaolaina tagata o le lalolagi mai le pologa o le agasala. O lona toetu manumalo mai le oti ma le tuugamau, ma

ua ia aumai ai le avanoa mo tagata uma e ulufale ai i le Malo o le lagi, pe a talia le ala tonu e ui ai, e pei ona faailoa mai i lona soifua ua foaifua mai. O le tatou mataupu lena i lenei Aso Sa.

Uiga o Upu:

- i) aga - umi o le alofivae
- ii) milo - tavi’ovi’o

GALUEGA FAATINO:

Faamatala mai i ni au lava upu le uiga o le ala i le Malo o le lagi, o le a tonu le ala tatou te savalia? Faamatala mai i ni fuaiupu se lima.

PESE: Pese ma Viiga 155

A’OA’OGA:

- 1. ‘Aua le popole ia maua le oa o le lalolagi.
- 2. Ia ola i mea lelei i aso uma.
- 3. Ia naunau ia taunuu i le Malo o le lagi.

.....

ASO SA: 16 IUNI 2024

MATAUPU: IA MANATUA LE ATUA I ASO UMA

SINI: Ia malamalama le vasega, e finagalo le Atua ia tatou usitai ma alolofa ia te Ia i taimi uma.

TUSI FAITAU: Teuterenome 6: 4 – 15

FESOASOANI MO FAIAOGA:

O le tatou mataupu i lenei Aso Sa, sei faamanatu ma faamalamalama i fanau o le tulafono sili lenei o lo o fusia faatasi ai tulafono uma na tuuina mai e le Atua mai luga o le mauga o Sinai, ina ia ola ai Isaraelu i aso uma. Ia e alofa atu i le Alii lou Atua ma lou loto atoa, ma lou agaga atoa ma lou malosi atoa. Ia e matuā a'oa'o soo i ai i lau fanau, ma ia e tautalatala ai, pe a e nofo i lou fale, pe a e savali foi i le ala, pe a e taoto, pe a e tula'i foi. Ia e fusi ai e fai ma faailoga i lou lima, e aveva foi ma pale i le va ou mata.

O lenei vaega o le tusi faitau o le tatou mataupu o lo o faamanatu mai ai, le tatau ona a'oa'oina tupulaga o mulimuli mai. O le mafuaaga o le faamalosia o le aoaoina o fanau, ona o le tusi a Teuteranome o loo taulai le faamoemoe mo fanau i le lumanai. Ina ia faatepa fanau o le taimi nei ma le lumanai i mea na tutupu i le tuanai, e mafai ai ona latou faavaeina se amataga fou. Auā o fanau o le faamoemoe lea o le lumanai, e le tuulafoa'iina foi i latou e le Atua. E pei ona fai mai le Teuteranome 30: 2. Ma e toe foi mai i le Alii lou Atua, o oe ma au fanau, ma lou loto atoa ma lou agaga atoa ma e faalogo i lona siufofoga i mea uma lava ou te fai atu ai ia te oe.

O le tāua lea o le matuā a'oa'oina o le tulafono sili lenei i le fanau a'o i ai i le taeao o le latou talavou, e pei ona faamauiina i le fuaiupu e 6 e oo i le 9. O le vaega lenei o le tusi faitau, o le faatonuga ia manatua ma a'oa'oina i le moni ma le faamaoni, o le finagalo o le Atua i tupulaga i le taimi nei ma le lumanai. Pe mafai ona latou ola i se olaga fou, o le alofa atu i le Alii le Atua ma le loto atoa ma le agaga atoa ma le malosi atoa.

O lea foi le finagalo o Iesu i ana a'oa'oga i lana Tala Lelei. Peitai, ua faaopoopo ai Iesu le isi tulafono e lua ai tulafono sili e pei ona faamauiina e le Mareko 12: 31. Ia e alofa atu i le lua te tuaoi, e pei o oe lava ia te oe. E leai se poloaiga e sili atu ina poloaiga. Afai ua e alofa atu i le Alii le Atua ma lou loto atoa ma lou agaga atoa ma lou malosi atoa, ua fai foi ma au mea

fiafia lou loto alofa i so o se tagata, pe ma'i, vaivai, mativa, lē taualoa, malosi, mauoa ma tulaga aloaia, aua ua pulea e le Agaga o le Atua lou tagata atoa.

E lei galo lava iā Iesu, lenei poloaiga uma e lua a le Alii le Atua i lona afio mai i le lalolagi. Na Ia manatua le Atua lona Tamā, i lona finagalo ia faaolaina tagata uma i lona soifua sasa'a mai. Na ia faailoa mai ia i tatou le atoatoa o lona alofa faamaoni i le Atua lona Tamā ma i tatou tagata agasala. Na oo ai i luga o satauro ma maliu ai, a ua toe tu manumalo mai, mai le oti ma le tuugamau, auā ua ia faia le finagalo o le Atua i le alofa moni atoa ai ma le fanau a tagata. Ia manuia le Aso Sa.

Uiga o Upu ma Fasi Fuaitau:

- i) O le Alii e toatasi lava Ia - o lona uiga o le Atua le Tamā le Alo ma le Agaga Paia.
- ii) Ia tautalatala ai - Ia faamanatu pea lava pea
- iii) vagavagaia - siosiomia

GALUEGA FAATINO:

1. Ia toe faaupu mai e tamaiti le fuaiupu e 5, ma tusi mai ni fuaiupu se fa ou manatu..
2. Ia a'o tauloto le fuaiupu e 5 e oo i le fuaiupu e 9.

PESE: Pese ma Viiga 5

A'OA'OGA:

1. Ia e manatua le Alii le Atua i aso uma.
2. O le Atua e ou le ola ma mea lelei uma mo le manuia.
3. Ia e alofa i le lua te tuaoi e pei o oe ia te oa lava.

.....

ASO SA: 23 IUNI 2024

MATAUPU: O LE MALO O LE ATUA O LE AMIOTONU MA LE FILEMU

SINI: Ia malamalama le vasega o le Malo o le Atua e ogatotonu ai le amiotonu ma le filemu e fusia i le olioli mai le Agaga Paia.

TUSI FAITAU: Roma 14: 13 – 23

FESOASOANI MO FAIAOGA:

O le tatou mataupu i lenei Aso Sa, o le Roma 14: 13 – 23, o lo o galue ai Paulo e faasa'o feeseeseaiga i le va o Kerisiano malolosi ma Kerisiano vaivai. O feeseeseaiga e mafua mai i mea e ai. Ua manatu nisi ua le mamā nisi o mea ai, a o isi ua mamā mea ai uma. Ia 'aua le fefaamasinoa'i i mea e ai, ma 'aua foi le faafaigataina le ola Kerisiano o ou uso, ona o meaai. Ua ou mautinoa lenei mea mai le Alii o Iesu Keriso. "E leai se meaai e le mamā, a o meaai uma ua mamā mo Kerisiano uma e tatau ona aai ai. E pei ona faamauina e le Mareko 7: 19 "Aua e le oo ia mea i lona loto a o le manava, e oo ane i le maliuga. O lea ua taumamāina ai e Ia o mea e ai uma." Afai ua manatu le tagata e le mamā se meaai, ua lē mamā lava lea ia te ia, i lona loto fuatia ifo.

E le fiafia le isi uso Kerisiano ona o au mea e ai. Pe afai o lea, ia 'aua nei e fa'aalia sou lē fiafia ia te ia. 'Aua e te faaleagaina lona ola faatuatua ona o meaai ua e ai ai. "Aua e te faatupuina le loto leaga i ou uso Kerisiano ina ua e talitonu ua e faia mea lelei. O le Malo o le Atua, e lē o meaai ma mea inu. A o le amiotonu, filemu ma le olioli i le Agaga Paia. O i latou uma ua auaina ia Keriso i le ala lea, e fiafia mai ai le Atua, ma talia lelei e isi tagata. Ia tatou galulue malosi ina ia tatou maua le toafilemu,

ina ia i totonu o loto le loto fuatia ifo lelei, e faamalosiā ai i le uso a talavou ma ia tupu pea le alofa i le ola fesootai i aso uma. 'Aua le faaleagaina le galuega a le Atua ona o meaai. O meaai uma ua mama. Peitai, e lē lelei ia te oe ona e ai i se meaai e tupu ai le lē fiafia o le isi uso a Kerisiano. 'Aua lava e te faia se mea e oo ai ina agasala lou uso Kerisiano. E sili atu ona e lē ai i tino manufasi ma inu i le uaina e oo ai i le faia o le agasala. O a lava mea ua e talitonu ma e manatu ua lelei ma manuia i lou loto fuatia ifo, ia taofi i lou loto, ia na o oe ma le Atua e silafia ia mea, ma na te talia i lona finagalo. A e afai o le tagata ua manatu e le tatau ona ia 'ai ona e feteenai ma lona loto fuatia ifo, ae mulimuli ane ua ia 'ai ai, ona tuaina lea ua agasala. Auā e le o le faatuatua ua na taitaiina ia lana faatinoga. O mea uma ua lē faia i le faatuatua o le agasala lea. O le mea lea e tatau i Kerisiano malolosi ona matuā mafaufau lelei i a latou faatinoga, ina nei mea ane ua fai ma mea e loto vaivai ai nai uso ma tuafafine o lo o naunau ia alualu i luma lo latou ola Kerisiano. Ua fetalai Iesu, e le o meaai e leaga ai le tagata, auā e le oo i le loto ia mea. A o le loto ua talia tuinanauga o le tino ma agasala ai ma oo ai i le leaga. Fai mai foi Paulo, ua ou iloa ma mautinoa i le Alii o Iesu, e leai se mea e leaga fua, peitai o se ua manatu ua leaga le mea, ona leaga ai lea ia te ia. O le amanaiaina o le loto fuatia ifo lelei, o le isi uso Kerisiano, o le talia lea o lona talitonuga, ma faailoa i ai le alofa o Keriso. Auā na maliu Keriso mo lea uso ma tagata uma. Auā e le faailoga tagata le Atua.

O le avea ma tagata o le Malo le Atua, e le o meaai ma mea inu, a o le mafuta faatasi ma le Atua, ma foai mai lea e le Agaga Paia i lea tagata le filemu moni o Iesu Keriso. Ia maua le malosi e fa'aalia le alofa ma le agalelei i le isi uso a Kerisiano ma talia ai lona foi loto fuatia ifo lelei. E tatau i tupulaga talavou Kerisiano uma ia taumafai malolosi e atia'e faatasi le ola faatuatua, ma amanaia le loto fuatia ifo o le isi uso a autalavou.

O le uiga lea o le tatou mataupu i lenei Aso Sa, ia outou iloa ma le mautinoa, o le Malo o le Atua, e le o le talitonuga i meaai mamā, po o le poto i mea o le lalolagi nei ma lona tamaoaiga. A

o le loto fuatia ifo lelei i mea uma e faia i le amio sa’o ma mafuta ma le Atua, e mafaia ai ona outou maua le fesootaiga i le alofa faamalosiau i le isi uso Kerisiano, e tusa lava pe eseese lagona ma talitonuga.

Ia mamao ma outou le tusitusi lima ma le faailoga tagata. Ia outou iloa o le Malo le Atua, o le sa’o o lo oulua va fesootai ma le Atua ma isi tagata, i le faatinoga o le amiotonu, ona maua lea o le filemu ma le olioli mai i le Agaga Paia. O Iesu Keriso na te le’i teena lava se tagata, e ui ina faasaga tau mai. Na tu malosi atu e faailoa atu le amiotonu, le filemu ma le olioli i le Agaga Paia o lo o i le Malo o le Atua e ulufale i ai tagata faatuatua uma. Na maliu lava ona o lona alofa ia faaolaina tagata uma. o lona toetu manumalo mai le oti ma le tuugamau ua ia aumai le ola fou atali faavavau mo tagata faatuatua uma. Ia manuia le Aso Sa.

Uiga o Upu:

- i) tausuai - tauemu
- ii) tautevateva - savali tifatifa ma sipasipa
- iii) taofi - faatuatua

GALUEGA FAATINO:

Fa’aaliga manatu mo le 20 minute.

Fai mai Paulo ua mamā meaai uma. Ae fai mai le taofi o nisi, e le mamā nisi o meaai e pei ona aumai e le Levitiko 11: 20- 28 A o nisi meaai ua faasā mai e le Sofiua Maloloina ona e aafia le ola maloloina.

Ia vaevaeina le vasega i vaega e tolu. Ia tofu le vaega ma le mataupu e fai mai ai ni o latou lagona.

1. Ua mamā meaai uma.
2. Ua le mamā nisi o meaai, ma e sa i le Kerisiano ona ai.

3. Faasa mai e le Ofisa Soifua Maloloina nisi o meaai e le tatau ona aai ai.

PESE: Pese ma Viiga 130

A’OA’OGA:

1. ‘Aua le fe’inaua’i ona o meaai.
2. Ua mamā meaai uma.
3. O le Malo o le Atua, e le o meaai ma mea inu, a o le fai o lona finagalo.

.....

ASO SA: 30 IUNI 2024

MATAUPU: IA FAIA LE FINAGALO O LE ATUA

SINI: Ia malamalama le vasega, e finagalo le Atua, ia tatou ola i le amiotonu, loto maulalo ma le alofa.

TUSI FAITAU: Mika 6: 1 – 8

FESOASOANI MO FAIAOGA:

O le tatou mataupu i lenei Aso Sa, o se vaega o le mataupu o le tusi a le Perofeta o Mika, o lo o faailoa atu ia Isaraelu le finagalo moni o le Atua mo i latou, ia latou faia ma ola ai i aso uma. Auā ua latou tuinanau atu ma ifo i tupua ‘ese ma auauna i ai.

O le mataupu e ono i le tusi a le perofeta o Mika, ua poloa’iina ai o ia e le Atua, e ta’u atu i lona nuu o Isaraelu lona finagalo naunautai mo i latou. E foliga o se finauga a le Atua ua faaulu atu i le Faamasinoga faasaga i lona nuu o Isaraelu, auā ua latou solipala i o latou vae, le Feagaiga na osia i le mauga o Sinai (Esoto 19 & 20).

O lea ua valaau ai le perofeta ia Isaraelu, ia latou faalogologo mai i ai. Ua valaau foi i mauga ma mauga iti, ma faavae o le lalolagi e fai ma faatonu o le Faamasinoga. Auā na latou matamata ma vaai tino i le osiga o le Feagaiga i luga o le mauga o Sinai i le va o Isaraelu ma lo latou Atua. Ae le gata i lea, a o le anoanoai o galuega laveai a le Atua mo Isaraelu na latou molimau i ai. Pe ana mafai ona tautatala mai nei mea o le foafoaga, o molimau ola ia, o le moni ma le amiotonu o le finauga a le Atua.

Sei o outou ta'u mai pe se a ea se mea ua ou faia ua ou faatiga atu ai? Ina tau mai ia, ma molia ai au. Auā na ou faaa'e mai ia te oe mai le nuu o Aikupito ma faola ia te oe mai le mea sa nofo pologa ai. O le fesili a le Atua, ua faailoa ai lona faanoanoa ma le finagalo nutimomoia, a e lē o se faitioga. A'o le mea moni o lona alofa tunoa. Pe i ai se taimi ua Ia tuulafoa'iina ai i latou? Ua outou tomumu so'o mai, ma ou tali atu i le alofa, ma ua ou le tuua outou i lalo.

Na ou filifili taitai faatuatua ma faamoemoeina mo lo outou malaga i le vao tuufua, o Mose, Arona ma Miriama, ma sa outou faalogo ma usitai i ai. O Mose o le perofeta, ua ia tuuina atu ia te outou tulafono. O Arona na fai ma ositaulaga sili, ma Miriana o le perofeta tamaitai na taitai ia te outou i viiga i le Atua ona o lona agalelei.

O galuega lelei a le Atua ia te outou o lona alofa laveai mai lo outou le lavatia tauave le tiga o le pologa i Aikupito. Na ou liliuina foi le fetu'u a Palako le tupu o Moapi, ma ua fai ma faamanuiaga mo outou. Ia outou manatua foi, ua ou vaeluaina le vaitafe o le Ioritana mo outou, ma savavali ai i le iliti vai i le isi itu o le vaitafe.

I lenei finauga a le Atua i lona nuu o Isaraelu, ua tali faitau ai le perofeta o Mika mo lona nuu, i le agalelei ma le alofa tunoa ma le faamaoni o le Atua. Ua fesili o ia ia te ia lava mo ona tagata. Ou te alu atu ea ma ni a i luma o le Alii Silisili Ese, ou te ifo atu ma ni a i le Atua maualuga.? Ou te alu atu ea i ona luma ma taulaga mu, ma tama'i povi e tasi lo latou tausaga? E fiafia ea le Alii i le afe o mamoe po'a, ma le manomanō o alia o tafe i

suāsuu? Ou te tuuina atu ea la'u ulumatua e sui ai lau solitulafono o la'u fanau to tino e sui ai le agasala a lou agaga?

Ua toe tali lava le perofeta o Mika i ana faafesili ia Isaraelu a o faalogologo. E le finagalo le Atua i ia mea. O le finagalo o le Atua mo Isaraelu uma. Sole ua fa'aali atu e Ia ia te oe le mea lelei, se a foi se mea e finagalo ai le Alii ia te oe, pe afai e le o ia mea, ia fai le amiotonu, ia naunau i le alofa, ma ia feoi ma lou Atua ma le loto maualalo.

O le finagalo moni o le Atua, e le o ni mau tamaoaiga e ofo atu e fai taulaga ai ia te Ia. Auā o Ia lava o le tamaoaiga sili i le lagi i luga ma le lalolagi i lalo nei. O le naunautaiga o lona finagalo ia faatino le amiotonu. Ia suia le ola agasala i le amio alofa ma le amio lelei. Ia amanaiaina tagata vaivai, matitiva ma le lē tualoa. Ia ola faapaiaina, ma ia alolofa i le Atua ma le loto atoa ma le agaga atoa ma le malosi atoa. Ia alolofa atu i isi tagata e pei ona latou alolofa ia i latou lava.

Fai mai Paulo i le Roma 12: 1 – 2. O lenei, le au uso e, ou te aioi atu ia te outou, ona o le alofa mutimutivale o le Atua, ia outou tuuina atu o outou tino i le Atua, o le taulaga ola ma le paia ma le malie o le mea lea e tatau ai ona outou faia. 'Aua foi tou te amio faatasi ma lenei lalolagi, ae peitai ia liliuina i le toe fuataina o outou loto, ina ia outou suesue pe se a le finagalo o le Atua, o mea ua lelei ma le malie ma le atoatoa.

Isaraelu, o le filifilia o le Atua, o lona finagalo ia mafanafana lo latou fesootai ma Ia. Peitai, ua lafoai le Atua, ua mulimuli ma tapuai i atua faapaupau. Ua galo ia i latou le alofa laveai o le Atua ia i latou.

O le mea foi lea ua tutusa ai i tatou ma tagata Isaraelu. Ua galo ia i tatou le alofa o le Atua na Ia tausia mai i tatou ina ua tatou fananau mai. Ua ia faapelepeleina lo tatou ola i ona aao alofa, ma ua tatou taunuu manuia mai ai i lenei aso. Ua tatou le alolofa i le Atua, a ua fai lava le mea tatou te loto i ai. Fai mai le tatou mataupu, Ia fai le amiotnu, ia naunau i le alofa, ma feoa'i ma lou Atua ma le loto maualalo, o le finagalo lena o le Atua ia faia e tagata uma.

O Iesu Keriso na Ia atoatoa ona faia le finagalo o le Atua ina ia faaolaina le lalolagi agasala ia te Ia e ala i lona maliu ma lona toetu manumalo mai le oti ma le tuugamau. Ia manuia le Aso Sa.

Uiga o Upu:

- i) faaee - tapena ese
- ii) fefinaua'i - fefa'aalia'i lagona
- iii) manomano - ua tele, ua le mafaitauina
- iv) finau - ia faaulu se lagona faamalamalama i le faamasinoga.

GALUEGA FAATINO:

Fesili ma Tali:

1. O a ni galuega o le agalelei o le Atua na faia ia Isaraelu, o lo o ta'u mai i le tusi faitau?
 - Na faaee e le Atua ia Isaraelu ma faaola i le nofo pologa ai i Aikupito.
 - Na ou aauina atu Mose ma Arona ma Miriana e fai ma taitai ia te outou.
 - Na liliuina le fetu'u a Palako le tupu o Moapi e fai ma faamanuiaga mo Isaraelu.
2. O a mea o le foafoaga o lo o molimau i le alofa o le Atua ia Isaraelu? Faitau le Tusi Paia.
 1. O mauga
 2. Mauga iti
 3. Faavae tumau o le lalolagi.

Faailoa mulimuli tali o fesili nei i tamaiti, ina ua uma ona ave le avanoa e tali mai ai lava i latou.

PESE: Pese ma Viiga 147

A'OA'OGA:

1. Ia fai le amiotonu.
2. Ia naunau i le alofa
3. Ia loto maulalo.

.....

MANATU TAIALA O IULAI:

O LE ATUA O LE MALOLOGA LELEI

O a lava puapuagā o le olaga tatou te fetaia'i, o suiga matautia o le tau, le mau faama'i pepesi, ma faama'i oti, o le tele o mea tatou te atuatuvaile, ma popole vale ai o tatou loto, ua na o le Atua tatou te maua ai le malologa lelei. Auā na te aumai le filemu i o tatou loto, ma faasaoloto i tatou mai le pologa ona o puapuaga o le lalolagi o lo o tatou ola ai.

ASO SA: 07 IULAI 2024

MATAUPU: ULUA'I SAPATI

SINI: Ia malamalama le vasega, o le ulua'i sapati o le aso na malolo ai le Alii le Atua ina ua faauma e Ia lana galuega o le foafoaga.

TUSI FAITAU: Kenese 2: 1 – 3

FESOASOANI MO FAIAOGA:

Fai mai le Kenese 1: 1. Na faia e le Atua le lagi ma le lalolagi i le amataga. O lona uiga o le amataga o le i ai o mea o le foafoaga. O le Mataupu 2: 1 ua faailoa mai ai, ua uma lava ona faia o le lagi ma le lalolagi, atoa ma mea uma o i ai. O le fuaiupu 2: 2 ua toe faailoa atili mai ai, ua faapea mai – Ua

faauma e le Atua i le aso fitu lana galuega ua faia e Ia, ona malolo ai lea o Ia i le aso fitu i lana galuega uma na faia e Ia.

Ua faalua ona ta'ua le numera fitu i le fuaiupu lenei, o lona uiga e tāua tele le numera fitu. O le numera fitu e sau mai le upu Eperu o lona uiga ua atoatoa, ua faaumaina ua taunuu i le iuga.

Ona malolo ai lea, o lona uiga ua leai se galuega o totoe ua maea tapena galuega o le foafoaga, ua matuā lelei atoatoa mea uma. Ua malolo le Alii le Atua, auā ua leai se isi galuega o totoe o le foafoaga, ua mae'a tapena mea uma i lona matagofie. O lona uiga ua taofia galuega foafoa ina ua uma mea uma ona faia.

Ua le fesiligia le numera fitu ua faailogaina i le Tusi Paia o le fua faatatau paia o le gasologa o le taimi. Ua faamanuia le aso fitu, ma ua tuu eseese mai isi aso o le foafoaga. E faamanatu ai pea ma manatua le galuega o le foafoaga a le Atua. Ua Ia silasila atu i ai ua matuā lelei.

O le malolo ai o le Alii le Atua i le aso fitu, ua le faapea ua le lavā o Ia, a ua uma ma mae'a galuega foafoa, ua leai se mea e lei faia. O uluai aso e ono e galueaina ai le laueleele a o lona fitu, o le taimi paia. O le aso lea ua faapaiaina e toe faafoisia ai laueleele. Ua poloaiga ai tagata uma ia latou maitauina lelei aso galue o le Atua Foafoa ma le aso na malolo ai.

O le uluai sapatu, ua faamanuia i ai le Atua ma ua faapaiaina, auā ua malolo ai o Ia i lana galuega uma lava na Ia faia ma na saunia lelei. Ua faasaina foi galuega uma o le foafoaga ona faia e se tagata, auā na malolo ai le Alii le Atua mai i ana galuega uma. A o se alafua ua Ia faataoto e taitaiina ai tagata uma ma mea uma o le foafoaga ina ia malolo ai.

O le aso e malolo ai le eleeele mai le galueaina, a ia toe faafoisia i ai le tamaoiga, ina ia tumau le lelei auā e tua i ai mea o le foafoaga. O le aso e maua ai le malologa lelei mo tagata uma, mo le ola faafouina e fa'aaauu pea le galueaina o le laueleele. O le malologa foi, e tuuina ai le agaga o tagata uma i le Alii le Atua e ala i lona ola tapuai i le Atua, e na te faafoi mai le malosi i le agaga e faia pea galuega lelei uma. O le faatusa o le Atua na faia ai le tagata, o le mea lea e le tuulafoaiina ai o ia, ae i ai pea i

ana fuafuaga alofa, e pei ona Ia malolo ai, e tatau foi ona malolo le tagata.

O le ulua'i sapatu la, o le aso na mlolo ai le Alii le Atua, ina ua uma ona faia le foafoaga. A'o galuega o le alofa tunoa o le Atua, na ia fa'aaauu pea. O lona galue pea lea e faatumau le gasolo lelei o mea uma, auā le ola manuia o ona tagata ma mea uma ua faia. O lona fua faatatauina o gasolo o tausaga e lulu ai ma tausaga e selesele ai, o le tauvevela ma le tau malulu, o tau e toulua ai lau o laau, ma le tau e totogo a'e ai laau. O mea o le vanimonimo ua faia i lona sologa lelei i taimi. O le oo mai o le malamalama ma le pogisa, e galue ai manulele, ma isi galuega e tele ua lē ma faitauina. O galuega ia o le alofa tunoa o le Atua, e le tuua, e faia pea, aua le manuia solo lelei o mea uma na fai i aso uma.

O le aso fitu, ua Ia faamanuia i ai ma faasaina, auā na malolo ai o Ia mai lana galuega uma na fai o le foafoaga na Ia saunia. Ua faasaina le tagata o le tualuga o mea uma na fai, ma le foafoaga aoao, ona toe galueaina le laueleele, ae ia malolo ai, mo le malosi faafouina ma toe faafoi le lelei i le laueleele mo mea uma o le foafoaga.

O le aso fitu, o le uluai sapatu lea, ua Ia faamanuia i ai ma faasaina, auā na malolo ai o Ia mai galuega uma o le foafoaga. O le malologa lelei mo mea uma mo le malosi faafou e faatino pea galuega lelei mo le manuia o mea uma.

O le uluai sapatu o le aso o le manumalo a'ia'i o le Atua mai le soona nunumi ma le pogisa ma le gaogao ī ma le naumati i le lelei, ma tulai mai le foafoaga ua matuā atoatoa le lelei.

Ina ua agasala le tagata i le alii o le lalolagi, ua oo mai ai puapuaga i le tagata, ma ua faaleagaina ai le foafoaga aoao ona o le tuinanau i mea a le lalolagi. Ua afio mai lava le Alii lava ia, e ala iā Iesu Keriso lona Alo pele, ina ia toe maua le malologa lelei tumau mo le fanau a tagata ma mea uma na fai.

O le maliu puapuaga o Iesu Keriso i luga o le satauro ua ia faamagaloina ai a tatou agasala uma, ma lona toetu mamalu mai le oti ma le tuugamau, ua ia aumai ai le malologa sili mo tatou agaga ma ulufale atu ai le Malo o le Atua faavavau.

Ua suia ai le uluai sapatu i le Aso Sa paia o le aso o le manumalo a'ia'i o le Atua i mea uma. Ia manuia le Aso Sa.

Uiga o Upu:

- i) faauma - ua gata faatinoga ua maea
- ii) aso fitu - ua atoa, ua maea
- iii) malolo - taofia galuega ona ua leai se mea o totoe.
- iv) faamauina - ua faasiliina isi aso

GALUEGA FAATINO:

1. Ia faailoa mai e le vasega o mea ua faasaina.
2. O a galuega e tatau ona faia i le Aso Sapatu.

A'OA'OGA:

1. Ia manatua le Aso Fitu e te malolo ai.
2. O le Aso Sapatu mo tapuaiga i le Atua.
3. Ia faia pea galuega alofa i le Aso Sa.

.....

ASO SA: 14 IULAI 2024

MATAUPU: O GALUEGA ALOFA

SINI: Ia malamalama le vasega, na faatino e Iesu e faia pea, galuega alofa i le Aso Sa.

TUSI FAITAU: Mareko 3: 1 – 6

FESOASOANI MO FAIAOGA:

O le tatou mataupu i lenei Aso Sa, ua faamalolo e Iesu le tagata ua gase lona lima i le sapatu, ona o le alofa. Ua maluu Iesu i le sunako i le Aso Sapatu. A'o agai Ia i totonu o le sunako i lona nofoaga, a'o lei amataina le sauniga. E lua ni mea ua maitauina e Iesu.

Muamua, o le tagata ua gase lona lima taumatau, ma o le tagata kamuta e pei o le molimau o le tusitala a le Evagelia a Luka.

O lona lua o mea ua silafia e Iesu, o le tulimata'i lea o Ia e le vaai a ona fili, o le au faresaio, pe na te faamaloloina le lima gase o le tagata kamuta i le aso malolo o le Atua.

E tolu ni mea ua sese ai manatunatuga o le au faresaio. Muamua, ua latou mananao e soli e Iesu le tulafono o le sapatu. Ua latou mananao ia faia se mea sesē o le faafeagai lea o le faatinoga o le alofa. O lona lua, ua lē fia faalogo i fetalai a Iesu, auā ua uma ona filifili i o latou mafaufau a'o le'i o latou faafesaga'i. Ma lona tolu, ua leai so latou popole, pe faamalolo le ma'i pe leai.

Ua avatu ai e Iesu le fesili mo latou le au faresaio, e aumai i ai sa latou tali. O le fesili ua faailoa atu i ai lo latou sesē le uiga moni o le sapatu. O le a le fa'aaogaina o le sapatu i auala nei, tou te iloa e fiafia mai i ai le Atua? Ua leai se tali. O le fesili ua faailoa ai le fiafia o le Atua i le faatinoga o le lelei, ua faia i le sapatu po o le Aso Sa, i lo le faia o galuega ua faasaina.

Ua tigā le finagalo o Iesu, auā ua maa'a pea o latou loto. Ua leai se alofa i tagata mafatia i ma'i, ma lo latou valelea ma le vaivai, ua pogisa ai o latou loto ma mafaufau i le uiga moni o le sapatu po o le Aso Sa. Ua latou manatu lava o a latou fuafuaga e fasiotia Iesu e fiafia mai i ai le Atua.

Ua fetalai atu Iesu i le tagata ua gase le lima, e faaloaloa le lima. Ua faaloaloa e le tagata lona lima, ona toe lelei ai lea. Ua talitonu le tagata i le alofa o Iesu, ua ia usitai ai e faaloaloa lona lima, ma faamalolo ai lea. Ua maua le mafai e le tagata sa gase le lima, e toe faatino ai ana matafaioi, auā le manuia o tagata ua faalagolago ia te ia. E faalagolago lo tatou malologa lelei mai

faigata uma ina ua tatou talitonu ma faatuatua i le alofa o le Atua.

O Kerisiano uma, ua latou le tausia le sapati o le tulafono e fa, ae o le Aso Sa o le Aso Toetu. E le sa'o pe a tatou ta'ua le Aso Sa o le Sapati. O le tulafono o le sapati ua alu atu, e pei foi o le tulafono e faatatau i osiga o taulaga i le malumalu ua alu atu.

I luga o mea uma, o le Aso Sa, tatou te olioli ma fiafia ai, auā ua toetu manumalo mai Iesu ua soifua faavavau ma mafuta mai ma auai faatasi ma tatou e oo i le faavavau, auā o ana galuega alofa ua tatou saoloto ai.

Uiga o Upu:

- i) sunako - falesa
- ii) molia - tuuaiga ua soli tulafono
- iii) gase - ua faigata ona faagaioi
- iv) faaloaloa - faasa'o i luma le lima

GALUEGA FAATINO: Fa'aaliga manatu

Ia faailoa mai manatu o le vasega, pe solitulafono le faamaloloina e Iesu o le tagata ua gase le lima. Aumai ni mafuaaga o manatu fa'aalia. Ae a galuega a foma'i o galulue i le Aso Sa.

PESE: Pese ma Viiga 73

A'OA'OGA:

1. Aua le faaosoosoina se tasi e solitulafono.
2. Ia fai galuega alofa i taimi uma.
3. O le Aso Sa e mo faatinoga o le ola.

.....

ASO SA: 21 IULAI 2024

MATAUPU: O ARETO SA

SINI: Ia malamalama le vasega o areto sa, o falaoa e sefulu mo osigā taulaga i le malumalu.

TUSI FAITAU: 1 Samuelu 21: 1 – 6

FESOASOANI MO FAIAOGA:

O le tusi faitau o le tatou mataupu o lenei Aso Sa, ua avatu e Aimeleka le ositaulaga o le malumalu i Nove o areto sa, o falaoa e sefulu mo Tavita e 'ai ai.

O areto sa nei mo le vaiaso. O Aso Sa uma lava, e auina ai isi falaoa fou e sefulu e tu'u i luga o le fata faitaulaga. A oo i le Aso Sa o totoe ni areto sa, ona fai lea ma meaai a le ositaulaga, ae fa'aaoga areto sa fou. O Nove e i le itu o matu i sasa'e o Ierusalemā e tusa ma le tasi ma le afa maila.

O le amataga lenei o sulufaiga a Tavita mai iā Saulo le tupu o Isaraelu. Ua mua'i sulufai ai i le malumalu i Nove, le ositaulaga o Aimeleka mo se fesoasoani. O le tagata o le Atua, ua ia manaomia se fesoasoani mai le Atua e ala i lana ositaulaga. Ua popole le ositaulaga, auā ua alu toatasi Tavita, auā o ia o le taitai au sili a le tupu o Saulo e tataua ona i ai ni fitafita latou te faafeao o ia.

Ua fatu e Tavita se tala faatupu, e nana ai le mea moni ua tupu. Fai mai Tavita iā Aimeleka, ua auina mai o ia e Saulo i se feau faapitoa faalilo e na te faataunuaina. O se faamatalaga taufaasese, a o se pepelo matuiā. O nisi na latou o mai, o lo'o o atu i le isi mea, a ua sau o ia e saili fesoasoani mo se latou meaai. Ia aumai ia se mea o ia te oe. Ua tali atu le faitaulaga, ua leai se areto le sā o ia te au, ua na o areto e sa. Ae mafai ai, pe afai ua nofo ese outou ma a outou avā. Ua fai atu Tavita, ua po tolu o nofo ese matou avā ma matou. Ua paia matou, ua

peiseai ua le sa foi le areto, i le ma lea foi ua faapaiaina nisi areto i le aso nei i le ipu. Ona avatu lea e le faitaulaga iā Tavita le areto sa.

O le finagalo foi o Iesu, i le mea lenei na faia e Tavita. O le mea tatau ua faia e Tavita. O le ola o le tagata soifua e muamua i mea uma i lo le tausia o tulafono o taulaga. O le mea lea na tele ai ina tupu le faitioga i le Alii o Iesu, auā o a lava le mamapo o le tausiga faamaoni e Faresaio o tulafono, a'e a oo loa i le faatinoga o le alofa lavea'i o le Atua i le ola o ona tagata ua mafatia ma lamatia, tatala loa le sa, ae faatino lona alofa lavea'i. O le mea lava lea na oo ai Iesu i le satauro, o le alofa lavea'i o le Atua i ona tagata. O tulafono lava o le alofa tunoa ma le mutimutivale o le Atua, na maualuga i le finagalo o Iesu, na oo ai lava i lona maliu, a ua toetu manumalo mai i le oti ma le tuugamau o le alofa lava ia i ai faatasi i tatou i le Malo le Atua faavavau.

Tamaiti, afai ua e pasi ma se fale ua mu, ia e afe e vaai, po o i ai se tagata o i ai i totonu. Afai o i ai ua faigata ona sau i fafo, talepe le faitotoa, ma alu e lavea'i lona ola. E le mafai ona molia oe i le tulafono, auā ua e faasaoina se ola o se tagata.

A'o le uiga lea o le tatou mataupu i lenei Aso Sa. O a lava mea ua faasa mai e le Atua mo tatou, e silasila mai loa ua aafia le ola o lana fanau i le lalolagi, tatala loa le sa, ae faatino lona alofa faaola. Aua o lo tatou Atua, o le alofa tunoa ma le alofa mutimutivale uma lava. Ia manuia le Aso Sa.

Uiga o Upu ma Fuaitau:

- i) areto sa - o falaoa mo taulaga i le malumalu
- ii) nofo 'ese - ua lē momoe faatasi

GALUEGA FAATINO: Debate

Vaevae le vasega i vaega e lua:

1. E tatau ona faataga Tavita e ai le areto sa. Tau mai mafuaaga.
2. E le tatau ona ave e le faitaulaga areto sa iā Tavita. Tau mai le mafuaaga o outou manatu.

PESE: Pese ma Viiga 238

A'OA'OGA:

1. Ia faamuamua le lavea'iina o le ola.
2. E taga mea uma ona o le alofa.
3. Aua le tau faasese.

.....

ASO SA: 28 IULAI 2024

MATAUPU: O IESU O LE MALOLOGA O AGAGA

SINI: Ia malamalama le vasega, o Iesu o le malologa o agaga mai puapuaga o le ola agasala.

TUSI FAITAU: Ioane 3: 16 – 21

FESOASOANI MO FAIAOGA:

O le tatou mataupu o lenei Aso Sa, o Iesu o le malologa o Agaga mai le puapuaga o le ola agasala.

O le fuaiupu e 16 o le tatou tusi faitau, o le fuaiupu sili ona lauiloa i le Tusi Paia. Ua faamatalaina ai ni nai upu o le talitonuga o Kerisiano uma. Ua ta'u mai ia i tatou, le mafuaaga moni o le aauina mai e le Atua o lona Alo o Iesu e maliu mo i tatou, ina ia tatou maua le malologa lelei mo tatou agaga. E tele mafuaaga ua faia ai e le Atua lenei mea.

1. O Ia o le Atua amiotonu. Afai e amio sesē ma leaga e tatau ona faasalaina. O Iesu la ua tigaina i lo tatou faasalaga ua fai ma o tatou sui tulaga.
2. O Ia o le Atua e paia. E na te lē faatagaina i tatou i lona malo, auā ua tatou agasala. O Iesu e le'i agasala lava Ia, ua na tauave le faasalaga o a tatou agasala, e sui tulaga ia i tatou. Afai tatou te talitonu i lenei mea, ua tatou talia Iesu ma lana amiotonu na fai mo i tatou. Afai e silasila le Atua ia i tatou e filifili o Ia e silasila iā Iesu o le amiotonu ae lē o tatou o tagata agasala.

A o le mea ua matuā manino mai i le fuaiupu lenei, le mafuaaga moni ua auina mai ai Iesu e maliu mo i tatou, ona o lona alofa ua tele naua mo i tatou.

O lona natura o le alofa. E na te faia mea uma ona o lona alofa. O lona alofa e papa'i mai ia i tatou i taim uma, auā o ona tagata na Ia faia, ma e le faapito, ae mo lana fanau uma. Ua ia aumai le mea sili ona Ia faapelepele i ai, o lona Alo pele e toatasi.

O le ola faavavau e le o le ola pea e leai se iuga. O tatou tagata, e feagai ma faigata eseese. E matitiva, e fia aai, e mama'i, e feagai ma tiga. E le lelei lea ituaiga olaga ona fa'aauau pea, e leai se iuga. A o le ola faavavau e aumai e le Atua ia i tatou e ala iā Iesu. Ua Ia tuuina mai mo i tatou i le taimi nei.

O le tautinoga amiotonu a lo tatou Atua, mo tatou uma le ola pea faavavau e tusa pe tatou te oti i le tino nei. O le ola faavavau, e le toe i ai se oti, leai ni toe mama'i, leai ni fili, po'o le agasala, po o ni mea leaga. O le tatou ola i le lalolagi ua na o sina taimi. A oo mai le mutaaga o lo tatou ola i le lalolagi nei, ona tatou ola lea i se olaga matagofie faatasi ma lo tatou Atua, auā ua maua e o tatou agaga le malologa lelei. Ua leai se toe puapuaga, ua na o le filemu ma le olioli moni.

O le ola faavavau, o le meaalofa foa'i fua a le Atua, E tatou te le agavaa i ai, tatou te fiu saili e le maua, pe a le foa'iina e le Atua e ala iā Iesu Keriso. E tatau ai ona tatou matuā talitonu ma faatuatua iā Iesu. O le talitonu o lona uiga e sili atu i lo le iloa o

Iesu, o Ia foi o le Atua. E tatau ona matuā talitonuina Iesu i le atoatoa. Afai la tatou te fia maua le malologa lelei mo tatou agaga mai fita ma puapuaga o le agasala i le lalolagi, ae ua na o Iesu tatou te maua ai. E pei ona molimau le Mataio 11: 18 “Ia outou o mai ia te a'u, o outou uma o e tigaina ma mafatia i avega, o a'u foi e malolo ai outou.”

O le amiotonu ma le faamaoni o le Atua, na taunuu lava lona Alo pele toatasi i le satauro ma maliu puapuaga, sui tulaga o Ia mo i tatou ina ia faamamaina a tatou amio agasala uma, ia maua le malologa lelei mo tatou agaga. O lona toetu manumalo mai le oti ma le tuugamau ua tatou ulufale ai i lona malologa lelei e faavavau ma faatasi ma Ia.

O le mataupu lena mo lenei Aso Sa, tau ina ia a'oa'oina i tatou, o Iesu le malologa lelei mo tatou agaga. Ia manuia le Aso Sa.

Uiga o Upu ma Fuaitau:

- i) fano - faaumatia le ola
- ii) ola faavavau - o le soifua o lo o soifua ai le Atua.
- iii) malamalama - O Iesu lava le malamalama.

GALUEGA FAATINO:

Ioane 3: 16. Ia faalatele mai le fuaiupu lenei i ni ou lagona, ma lou malamalama le uiga loloto o upu o lo o tusia ai. Tusi mai lou lagona i se afa itulau (half page)

PESE: Pese ma Viiga 72

A'OA'OGA:

1. O Iesu o le malologa o agaga.
2. Ia talitonu ma faatuatua ia Iesu.
3. Ola faavavau o le meaalofa foa'ifua a le Atua.

.....

**MANATU TAIALA O AOKUSO:
IA FAI OE MA FAAOLA I ISI TAGATA**

O le galuega lea na afio mai ai Iesu i le lalolagi, ia fai o Ia ma Faaola mo tagata o le lalolagi. O lana Tala Lelei lea ma le feau momoli mai mo i tatou ia talia o Ia faatasi ma lana Tala Lelei, ina ia fa'aaogaina lo tatou ola e fai ma faaola i ou matua, lou aiga, o lou nuu, le atunuu, aemaise lana Ekalesia. Ia fa'aaoga tatau lo tatou ola.

ASO SA: 04 AOKUSO 2024

MATAUPU: MANATUA NA O LELEI

SINI: Ia malamalama le vasega, o lo tatou faia o amioga lelei, e alofagia ai tatou e le Atua ma tagata.

TUSI FAITAU: Kenese 50: 15 – 21

FESOASOANI MO FAIAOGA:

O le mataupu i lenei Aso Sa, Ia manatua na o lelei e te faia i isi tagata. O le tatou tusi faitau, o se vaega i tala ia Iosefa ma ona uso, o i latou o le fanau a Iakopo po'o Isaraelu.

Ina ua uma ona tanu e Iosefa ma ona uso lo latou tamā o Iakopo i le ana Makapelu i luma o Mamere i Kanana, ua oso a'e i o latou manatu, a nei e faaosofia le loto o Iosefa i se tau'i ma sui i mea leaga na latou faia ia te ia. Ona latou avatu ai lea o le logo ia Iosefa, faamanatu ia te ia le poloaiga a Iakopo lo latou tamā. Ia faapea ona outou fai atu ia Iosefa, ou te aioi atu ia te oe, ia e faamagaloina le agaleaga a ou uso ma la latou agasala, auā ua latou agaleaga atu lava ia te oe, o lenei matou te aioi atu, ia e faamagaloina le agaleaga a auauna a le Atua o lou tamā. Ona tagi lea o Iosefa ia latou upu ia te ia. Ua o atu foi ona uso, ma faapa'uū i ona luma ma fai atu i latou ia te ia, Faauta, o au

auauna i matou nei. Ua taunuu lava miti a Iosefa e pei ona faamauina i le Kenese 37. E faapea e ifo mai a outou fusi saito, i la'u fusi saito. Ona fai atu lea o Iosefa ia te i latou, 'aua nei o outou matata'u, pe la o a'u o le sui o le Atua.

O le faailoga ua teena e Iosefa le taunuuga o lana miti. Auā e le talafeagai, ona o le fesootaiga o ia ma ona uso. A ua ia fai atu, a o outou na fai togafiti e outou, ia leaga ai a'u, a o le Atua, ua finagalo ia i'u i le lelei, ma oo ina faaolaina o le nuu e toatele, e pei ona taunuu ai i ona po nei. O lenei, 'aua ne'i matata'u outou, o a'u nei ou te tauti lava ia te outou ma a outou fanau.

Ioe, o le manatu lava o le tatou mataupu, ia manatua lelei ia faia i aso uma. E pei ona faia e le Atua le foafoaga i le matua lelei, e faapena lava lona finagalo mo tagata uma ia manatua na o le lelei. O Iosefa na agaleagaina e ona uso, peitai, e na te le manatua ni leaga. Auā sa faalagolago ma faatuatua i le Atua, o le na te mafaia ai mea uma i le lelei. O le agaleaga e iu ina liliuina i le lelei auā o le Atua e lelei i taimi uma.

O Iosefa na tele mea leaga na oo i ai. Amata mai lava i lona aiga, ma tuua ai lona faasinomaga e alu i nofoaga e le'i manao i ai. A o le Atua na liliuina le leaga sa la faafesagai, ma fanau mai ai le lelei ma avea ai ma faaola i tagata e toatele ina taimi o le Feagaiga Tuai.

O le feau lea ua aumai e le tatou mataupu i lenei taeao. Ia manatua na o le lelei, e faia i taimi uma. O Iesu Keriso o le atoaga o le faatinoga o le lelei i taimi uma. O lona maliu na afua ona o le faatinoga o le lelei. O lona Toetu mamalu ua tatou avanoa ai e ulufale i lona Malo Lelei faavavau. Ia manuia le Aso Sa.

Uiga o Upu:

- i) faalotoloto - osofia le loto e tau'i le leaga
- ii) faamatalaloto - faamalosi

GALUEGA FAATINO:

Ta’u mai ma tusi mai igoa e toasefulu o uso o Iosefa na latou agaleaga ia te ia.

PESE: Pese ma Viiga 8

A’OA’OGA:

- 1. Ia faia le lelei i taimi uma.
- 2. Ia tauī atu le leaga i le lelei.
- 3. E lelei le Atua i taimi uma.

.....

ASO SA: 11 AOKUSO 2024

MATAUPU: O UŌ A IESU (Aso Sa o Tama)

SINI: Ia malamalama le vasega, o se ua fai uō ia Iesu, e tatau ona faalogo ma usitai i lona a’oa’o mai.

TUSI FAITAU: Ioane 15: 12 – 17

FESOASOANI MO FAIAOGA:

O upu ogatotonu o lenei fetalaiga a Iesu, ua Ia fetalai ai i ona so’o, latou te lei filifilia o Ia, a’o Ia na filifilia i latou. O lona uiga foi, o i tatou foi tatou te lei filifilia le Atua, peitai o le Atua i lona alofa tunoa na ia faalatalata mai ia i tatou e ala i lona valaaau ua faia i lona alofa. O lenei vaega o le tusi faitau, ua faailoa mai ai ma ua valaaauina ai i tatou.

Ua filifilia i tatou mo le alofa. Ua valaaauina i tatou, e o atu i le lalolagi uma e alolofa le tasi le tasi. O le Kerisiano e ola i se auala e faailoa atu ai le uiga o le alofa i le isi uso Kerisiano.

O i tonu lava na fetalai ai Iesu i lana tautinoga faamaoni. Afai tatou te fesili ia te Ia, o le a le mafuaaga e faamalosia ai lo tatou fealolofaa’i?

O lana tali lea, “E le sili lava le alofa o se tasi i lenei alofa, ia tuuina atu e se tasi lona ola mo ana uo. O a’u uo outou, pe afai tou te faia mea uma lava ou te fai atu ai ia te outou.” Ua poloaiga ai e Iesu, ia alofa le tasi i le tasi auā ua Ia faataunuuina le alofa atoatoa.

Ua valaaauina e Iesu tagata uma o ana uo, latou te faia mea uma ua ia a’oa’o mai, ma poloa’i mai ai. O i latou uma ua valaaauina i le alofa tunoa o Keriso, ua ta’ua i latou o ana uo, ae le o ni auauna. O uo, auā ua faailoa mai e Iesu mea uma ua faia e lona Tamā, a o le auauna na te lē iloa mea ua faia e lona matai.

O Iesu ua Ia valaaauina i tatou e fai ma ana uō. O lona uiga ua tatou lē toe vavamamao ma le Atua, ua tatou militino ma Ia, i le faatuatua maua’a. O le faamanuiaga mai ia Iesu, ina ua tatou soso’o faatasi ma lo tatou Atua e le aunoa.

Ona ua tā’ua i tatou o Kerisiano, o uo a le Atua, ua avea ai foi i tatou ma ana paaga. Ua tatou paaga ma lo tatou Atua, i lo tatou valaaauina i ana feau ina ua avea ma Kerisiano faamaoni ma le faatuatua, ma le alofa ua fa’aalia i so o se tagata.

Ua tatou iloa nei le alofa moni o Iesu ia i tatou e ala i lona alofa faamaoni, ina ua leai se mea ua natia e Ia, a ua faailoa mai mea uma o lo o faia e le Atua lo tatou Tamā. O lona alofa tunoa ua maua ai lo tatou faamanuiaina. E lē o se mea ua tatou sailia, ae o le meaalofa foai fua mai i lona alofa tunoa ma lona mamalu. Aua ua fai mai le tusi a le poto, Faataoto 8: 31, Sa ou olioli i mea e mau ai tagata i lona lalolagi, o lou fiafia foi sa i le fanau a tagata lea. Ua tatou vaai la i le alofa naua o lo tatou Atua ma le Alii o Iesu Keriso ia i tatou le fanau a tagata. O lea sa tatou tali atu i le maualuga o lona alofa. Fai mai le tatou mataupu i lenei Aso Sa. O tatou o Uo a Iesu pe a tatou faia mea uma lava, ou te fai atu ai ia te outou.

O le faatinoga o le alofa faamaoni ia i tatou o ana uo. E le sili lava le alofa o se tasi i lenei alofa, ia tuuina atu lona ola mo ana uo, e ala i lona maliu ma lona toetu mamalu mai le oti ma le

tuugamau, ua fai ai tatou ma ana uo e faavavau. Ia manuia le Aso Sa.

Uiga o Upu ma Fuaitau:

- i) filifilia - valaauina, tofia.
- ii) uo - pe a faia mea uma e fai mai le isi uo.
- iii) tuuina le ola e sui ai ana uo – oti mo ana uo, ia faasaoina le ola.

GALUEGA FAATINO:

Ua naunau mai lava Iesu tatou te fealofani, ma ua Ia poloai mai ai.
Faamatala mai ni ou lava lagona le ala ua faamalosi mai ai Iesu tatou te fealofani. Tusi mai ni laina se lima.

PESE: Pese ma Viiga 74

A’OA’OGA:

- 1. Ia tatou fealofani.
- 2. Ia tatou faia mea uma ua fai mai ai Iesu.
- 3. Ia ola e tusa ma amio a uo a Iesu.

.....

ASO SA: 18 AOKUSO 2024

MATAUPU: UA LAVEA’IINA LE NUU

SINI: Ia malamalama le vaega, ua lavea’iina le nuu ona o le loto nuu.

TUSI FAITAU: Eseta 4: 4 – 17

FESOASOANI MO FAIAOGA:

O le tatou mataupu i lenei Aso Sa, ua lavea’i e Eseta le nuu o Iuta, mai togafiti leaga a Hamanu.

O le vaega lea o le tusi faitau, o gaoioiga a Moretekai e tauanauina Eseta le masiofo o le tupu o Asueru ina ia fai sana galuega alofa e lavea’i mai ai sa Iutā mai lenei fuafuaga le alofa a Hamanu. O Moretekai o le tamā fai o le masiofo o Eseta. Ua nofo i le faitoto’a o le malae i le ie talatala, ina ua maua le poloaiga ua uma ona faamaufailogaina i le faailoga o le malo. O le a faaumatia tagata uma o sa Iutā o i totonu o le malo, ma ona itumalo uma.

Ua oo atu le logo a galu teine a Eseta i le mea ua faia e Moretekai, ona matuā tiga ai lea o le masiofo o Eseta, ma faatonu e ave atu iā Moretekai ni ofu e ofu ai. A ua le mafai Moretekai ona ofu ai. O le mea lea e oo i ai tagata ua mau tulaga aloaia ma tele tamaoaiga. E latou te lē amanaiaina ma le ano ane i tagata ua puapuagaina, ma matitiva. O le vaivai lea o nei aso, a oo ina ua maua le tamaoaiga ona vaai faatauavaa lea i ē ua vaivai ma matitiva, ma lē taualoa

Ua toe auina atu Hatako le eunuka iā Moretekai ua fesiligia, po o le a le uiga o le mea, po o le a foi? Ua faailoa mai e Moretekai mea uma ua oo ia te ia, ua ia avatu foi le ata o le tusi o tulafono mai Susana i le faaumatia o tagata uma o Iuta. Ua ia fai atu, ia alu Eseta i le tupu e aioi atu ma faatoga atu ia te ia mo lona nuu. Ia fa’aaoga lona tulaga o le masiofo. Ona lagona ai lea e Eseta lona mafatia, i lona alofa i lona nuu. Peitai, ua lē mafai lava ona soona ulufale se tagata i le lotoā ma le maota o le tupu, sei vagana ua faaloaloa mai i ai le to’oto’o auro o le tupu ona faatoā mafai lea ona ulufale i le lotoā. O tagata uma e ulufale e aunoa ma le faaloaloa mai i ai o le to’oto’o auro o le tupu, o le iuga o le oti,

Ua ta’u atu e le masiofo o Eseta lenei tulafono iā Moretekai, ma faailoa atu foi, ua tolusefulu aso talu ona lē toe feiloai ma le tupu. E i ai foi lona talitonuga e leai foi sona avanoa e maua ai se feiloaiga. E i ai le manatu o aafiaga mai faiga lē alofa a

Hamanu. O tofotofoga ia ma lu'itau o le gasologa o le olaga. E leai se tulaga maualuga e saoloto mai i mea faigata. E toatele i latou ua lē mafai ona latou faatino le faamaoni ma le loto tele, ua latou fetaia'i ai ma tiga nai lo le manumalo. Ona ta'u atu lea iā Moretekai o upu ia a Eseta ona o le tulafono a le malo o Peresia.

Ona tali atu lea o Moretekai iā Eseta, nei e manatu i lou loto ina ua e i ai i le aiga o le tupu, e faasaoina ai oe ai sā Iutā uma. Auā afai e te matuā faalologo i nei ona po, e tupu mai le tuusaunoaina ma le lavea'iina o sa Iutā mai se tasi mea, a'o oe ma aiga o lou tamā e fano outou, e iloa e ai po ua fai oe ma masiofo ona o se aso faapenei? Ua ootia le loto o Eseta i upu a Moretekai. Ua maua ai lona malosi, ina ua papa'i atu le Agaga o le Atua o sa Iutā. Ua totogo a'e le faatuatua, ma manatua ai le Atua fai vavega iā Isaraelu i lona tala faasolopito.

Ua faatonu ai le anapogi ma le tatalo o le nuu uma. O ia foi ma lana galu teine, o le a faapea foi ona latou faia. Na iu i le faasaolotoina o sa Iutā, ina ua sa'o le ala e saili ai le lavea'iina. Na saili loa ma le talitonu ma le faatuatua i le Atua, aapa mai loa le aao o le alofa tunoa o le Atua, ma faaolaina lona nuu ua saili atu mo lona alofa faaola.

Ua fai mai se vaega o upu a Moretekai iā Eseta; Auā afai e te matuā faalologo i nei ona po, e tupu mai le tuusaunoaina, ma le lavea'iina o sa Iutā mai se tasi mea. O lona uiga o lo o i ai iā Moretekai le faatuatua mautinoa i le Atua e na te faaola ia sa Iutā. O le siitia o Eseta e fai ma masiofo a le tupu o Asueru, o le Atua na mafua mai ai ona o taimi faapenei. O le faatinoga o le loto nuu, e atoatoa pe a faalagolago i le Atua.

O le a'oa'oga lenei, e leai se mea lelei ona faia e le tagata, pe a leai se faatasi ma le Atua. O Iesu Keriso, na faalagolago atoa i le Atua le Tamā, na taunuu ai le atoatoa o lana faaolataga mo le lalolagi e ala i lona maliu ma lona Toetu mai i le oti ma le tuugamau. Ia manuia le Aso Sa.

Uiga o Upu:

- i) galu teine - o auauna a le masiofo
- ii) eunuka - tama e le fia fai toalua
- iii) tuusaunoaina - tatala, e saoloto/e lē saisaitia
- iv) amia - faatonu e auai
- v) ie talatala - ie matuituia, le faailoga o le nofo i tiga ona o mea faigata o le olaga.

GALUEGA FAATINO: Taliga Fesili

Tali mai fesili e 2 o i lalo i ni au lava upu, e tusa ma le uiga i le tala.

1. I le fuaiupu e 14 i tali a Moretekai ia Eseta, o lo o i ai le faaupuga faapea ... mai se tasi mea.” O le a o faatatau i ai lea faaupuga?
2. I le fuaiupu e 16. O i ai upu nei i le tali a Eseta – “afai ou te oti ai, oti ai pea ia.” Aiseā na tautala ai Eseta i ia upu?

PESE: Pese ma Viiga 356

A'OA'OGA:

1. Ia e alofa i lou nuu.
2. Ia saili i le Atua mo le lavea'iina.
3. Ia 'aua le vaai maulalo i tagata vaivai.

.....

ASO SA: 25 AOKUISO 2024

MATAUPU: UA PUPULA MATA O LE TAUASO

SINI: Ia malamalama le vasega, o le faatuatua e mafaia ai mea uma.

TUSI FAITAU: Mareko 10: 46 – 52

FESOASOANI MO FAIAOGA:

O le tatou mataupu i lenei Aso Sa; Ua pupula mata o le tauaso, o lo o faamatalaina mai e le tatou tusi faitau.

O le mea lenei na tupu i le aso mulimuli o le malaga a Iesu ma ona soo agai i Ieruselema. Ua malaga mai i latou mai Perea, ua latou laasia Ioritana, ma ua taunuu mai Ieriko. O lo o faatasi mai ai ma le motu o tagata agai i Ieruselema mo le tausamiga o le Paseka. E i ai le manatu o nisi o le motu o tagata ua latou ta'u atu i le tauaso aisi o Patimaio, o Iesu o lo'o faatasi ma le motu o tagata, o lo'o i ai lagona o nisi o tagata o Ia o le Mesia o lo o faatalitali i ai tagata Iutaia.

O le a tuana'i atu Ieriko, ae oo atu le tala i le tauaso o Patimaio, o lo'o auai Iesu le Mesia ua loa ona ia faatalitali i ai. Ona alaga leo tele lea ua faapea atu, "Iesu e, le Alo o Tavita, ia e alofa mai ia te a'u." Ona matua vavao atu lea o tagata e toatele ia te ia, ina ia faalologo ia, a o le tauaso o Patimaio, ua atili ai ona alaga leo tele, "Le Alo e o Tavita, ia e alofa mai ia te au."

O le manatu o le tauaso, o lona avanoa lenei ua leva ona faatalitali i ai. Afai e ela ia te ia le avanoa lenei, o lona uiga e oo mai le oti o tauaso pea. Ua ia malamalama foi, a oo mai le Mesia ua valoia, e na te faia vavega tetele o le alofa tunoa o le Atua. Ua lagona e Iesu le leo o le tauaso, ona tu lea ua fetalai, ia valaauina o ia. O le gaoiga lenei a Iesu ua Ia faatino ai le moni o lana fetalai e pei ona faamauina i le fuaiupu e 45 o le mataupu lenei. O le faailoga o lona alofa naunautai ia ola manuia tagata uma.

Ua faamalosi atu nisi o tagata, ia loto tele, ma tulai atu ia te Ia, o lo o valaau mai. E lei toe faatali le tauaso o Patimaio, ua lafoai lona ofu, ua tu i luga ma sau ia Iesu. Ua fetalai atu Iesu ia te ia, "Se a se mea e te manao i ai ou te faia ia te oe?" Ua tali atu le

tauaso ia Iesu, "Raponi e, ia vaai ou nei mata." Ona fetalai atu lea o Iesu i le tauaso, "Ina alu ia, o lou faatuatua ua e malolo ai." Ona vaai lea o mata o le tauaso ma mulimuli atu ia Iesu.

O le tala nei ia Iesu i lana faamalologa o mata o le tagata tauaso, a'o le faataoto foi i le auala e faamalolo ai le tauaso faaleagaga o lona auso'o. Ua a'oa'o mai le perofeta o Isaia ma isi, a oo ina afio mai le Mesia valoia, ona oo mai lea ma le pule aoao a le Atua i mea leaga a le tiapolo i le lalolagi.

O lenei tala i le faapupula o mata faaletino o le tauaso, a ua ia faapupula foi i ona mata faaleagaga. Ua atili ai ona tupu le faatuatua o le tauaso, ma ia mulimuli atu ai pea i le Alii o Iesu. O le alofa fai vavega o Iesu ua le faapito i se tagata, a o i latou uma e fiafia i le pupula o le malamalama o le Atua, e ala ia Iesu Keriso i lona maliu ma lona toetu mamalu.

Uiga o Upu:

- i) tuana'i - tea atu
- ii) faatoga - aisi
- iii) mana - faasino i le tagata fia maua se mea.
- iv) faalologo - ffilemu
- v) Raponi - a'oa'o po o le faiaoga.

GALUEGA FAATINO: Faatino le Tala

PESE: Pese ma Viiga 123

A'OA'OGA:

1. Ia faailoa ia Iesu o tatou mana'oga.
2. Saili le malamalama o Iesu ina ia ola ai.
3. Valaau ia Iesu pe a e ma'i.

.....

**MANATU TAIALA O SETEMA:
TALA LELEI O LE ALOFA TUNOA**

O le Tala Lelei ia Iesu Keriso na amata mai lava i le foafoaga o le lalolagi. O Iesu Keriso o Ia lava sa i le amataga o mea uma. O le Upu a le Atua. Ua na ona fetalai lava o le Atua ona iai lava lea o mea uma o le foafoaga. E le o se mea la e tau faamatalaina lea tulaga aua ua manino lelei i le amataga. Ua liutino tagata le Upu o Iesu Keriso lea. O Iesu Keriso o le Ala, Upu Moni ma le Ola.

ASO SA: 01 SETEMA 2024

MATAUPU: SUIGA (Aso Sa o le Tala Lelei)

SINI: Ia malamalama le vasega, o suiga e faia e le Atua i lo tatou ola, o suiga lava auā se lelei ma se manuia mo i tatou..

TUSI FAITAU: Ruta 1: 6 – 22

FESOASOANI MO FAIAOGA:

A oo ina logo tala le tagata i ni sugia fou o le a i ai le tala o le tau i lea taimi ma lea taimi. Ona tapena lea mo le oo mai. i lona faamoemoe ma le manatu maualuga, e lelei le tutupu ane, a ua lava saunia ma lava tāpena i ai. E lelei le oo mai, a ua iloa taga e fai i vasa. E leai se matua e mitamita pe a suia le olaga lelei sa i ai lana tama, i se olaga leaga. Atonu o le ala foi lea e le muta ai le taologologo pea a matua, ina ia iloa ola ma mautinoa lo latou manuia.

O le tupu ma le ola a’e o Ruta i totonu o lona nuu o Moapi, o le tupu ma le ola ae o le tagata e leiloa le Atua. E aifilofilo i totonu o le siomiaga o tagata faapaupau. Peitai, o lona ofi mai i totonu o le mafutaga faale-aiga fou e ala i le faaipoipo atu ia Kiliona,

na amata ai ona pupula mata o le fafine i le matagofie o le agalelei faapalepale o le Atua. E ui a la ina feagai ma tiga ma faigata mulimuli ane, peitai ua matuā tapenaina lona loto momoo e fia ola pea i le paulo o le alofa laveai o le Atua.

A lea ua tautino, **“Aua e te finau ia te au ina ia ou tuulafoai ia te oe, ia le mulimuli atu ia te oe; aua o le mea e te alu i ai, ou te alu ai foi; o le mea e te nofo ai, ou te nofo ai....”** O se tautinoga e faatino i le loto mau o le Atua, auā o le filifiliga e iai ona tua. O le filifiliga o lo o i ai ma le faamasinoga a le Atua.

Le fanau e, e fai e le Atua suiga o le ola. E leai se sootaga o Ruta ma Naomi, peitai ua avea le tala lelei alofa moni, ua fai lea ma sootaga faaaga-fesootai, ua le mafai ai e seisi lava mea ona momotu sei vagana lava le oti. O le pa mai o le tala i le avea o Saulo ma kerisiano, ma ua suia lona igoa ia Paulo, o se mea na matua faateia ma ofo tele ai le toatele o tagata. E lei iai foi se isi na na itea e mafai e le talitonuga faakerisiano ona liliuina le loto maaa o Saulo. A o suiga e faia e le Atua i lou soifua ma lo tatou ola, o suiga lava aua se lelei ma se manuia moi tatou. E lē faigata ona iloa le tagata ua sui e le Atua lona olaga, ma le tagata o lo o mau limalua ai pea le tiapolo i lona ua.

GALUEGA FAATINO: Sailiiliga

Tuu le avanoa i tamaiti e faamatala ai ni suiga i o latou olaga. Faapea ni suiga e moomia i totonu o aiga, aoga, nuu ma le ekalesia.

PESE: Pese 122

A’OA’OGA:

1. Fai se suiga i lou olaga.
2. Filifili i le lelei.
3. E galue pea le Atua e sui tatou olaga i le lelei.

ASO SA: 08 SETEMA 2024

MATAUPU: MALOSI I MEA LĒ AOGA

SINI: Ia malamalama le vasega, aua le aveva lou malosi ma mea e te mitamita ai.

TUSI FAITAU: 2 Korinito 12: 5 – 10

FESOASOANI MO FAIAOGA:

Lototele ma ia toa le loto, ma ia onosai i le mea e gata ai le onosai, o le a tapuai. O upu faamalosiau ma upu faatupu malosi. O oo foi ina fetuleni faatasi mai suiga e mapuna a’e i lea vaiata, ona leiloa lea e le tagata ona faavasega. Ma oo ina lē mau manatu poo le a le mea a fai. Ua leiloa pe alu i luma pe alu i tua. Ua leiloa pe faasaga i le lagi, pe sulu ai i i e tauivi ai.

A o la le perofeta o Isaia, “E te leiloa ea? E te lei faalogo ai ea? O le Atua o le vavau. Na te avatua le malosi i e ua vaivai, a o e ua leai se malosi, na te faatuputele i ai le malosi.”

Faamalosi lea a le aposetolo o Paulo, o taimi fa’apea e lagonaina ai lona malosi. E fiafia ma mitamita i taimi o puapuaga ma faigata. Aisea? Aua, e lagonaina ai le malosi mai le Atua. E le o le malosi e aveese ai fa’afitauli ma puapuaga, ae o le malosi e fa’aauau ai pea lana galuega. Ua manatu Paulo, ua tatau ona ia fa’aalia se va’aiga e sili atu, i lo vaaiga ua mitamita ai perofeta pepelo. O le vaaiga a Paulo, o se vaaiga e gata ai vaaiga, ma e sili atu i vaaiga o lo o mitamita ai perofeta pepelo.

Fai mai ua ia iloa se tagata kerisiano, ua segia i le lagi tua tolu, ma le parataiso. Lona uiga, o se tagata ua oo lava i le mea maua o loo afio ai le Atua, a o se nofoaga e i’u i ai tagata faatuatua uma e mafuta ma le Atua. Faimai Paulo, “sa tuuina mai ia te au le mea matuitui i le tino, e tu’i mai ia te au, ina ne’i ou faamaualuga.” A o le finagalo o le Atua mo Paulo: “O lo’u alofa tunoa e lava lea e fesoasoani ia te oe, auā o le vaivai e

fa’aatoatoaina ai lo’u mana.” Lea la, fai mai Paulo, “ou te fiafia i mea e vaivai ai, auā pe a ou vaivai, ona ou malosi ai lea.”

O le a so tatou vaivai ma le lē atoatoa, aua nei galo, e faaliliuina e le Atua lo tatou vaivai i le malosi. O a lava mea e tutupu i le gasologa o le soifuaga ma le olaga, pe feagai ma puapuaga, pe faafesagai ma faigata, e tupu le malosi e faatino ai le auauaga ma le tautua i le faalagolago i le Agaga o le Atua. Na lagona loa foi le vaivai o Iesu Keriso i luga o le satauro, na tapa lava foi i le Atua; “*Lou Tama e, ou te tuuina atu lou nei agaga i ou aao.*” O le faamaoniga lena o le Atua e toatasi, lea ua tatou maua ai le ola, ma maua atili ai pea.

GALUEGA FAATINO:

Ta’u mai ni mea se lima o lo o e vaivai ai:

- ✓ i lou aiga
- ✓ i lau aoga
- ✓ i lau galuega

PESE: Pese ma Viiga 167

A’OA’OGA:

1. Ia viia le Atua i mea uma.
2. Onosai i mea matuitui.
3. Faaaoga tatau lou malosi.

.....

ASO SA: 15 SETEMA 2024

MATAUPU: OLA I A KERISO

SINI: Ia malamalama le vasega, e manuia le ola pe a tatou oti i lo tatou tagata tuai a ia ola fou mo Keriso.

TUSI FAITAU: Ioane 8: 12 – 20

FESOASOANI MO FAIAOGA:

O le soifuaga ma le olaga ua tatou i ai, ua le masino le anoanoai o malamalama tau faasesē ua ‘ela ai le faatatau a le tagata. O le alualu lava o lea faimai, “O iinei o lo o i ai le malamalama o le Alii...Na o iinei lava e maua ai le Atua.” Ae mulimuli mai faapea mai, “Omai iinei, o le malamalama ma le talalelei moni leni a Iesu.”

Na faitio tagata ina ua faapea atu Iesu; “*O au nei o le malamalama o le lalolagi.*” A o le tu masani a Iutaia, e le taliaina se tagata e molimau mo ia lava. Faamanino e Iesu; E le faatuatuaina le latou mau, aua e le moni ma faamaoni. O outou e tou te faamasino i la le tino, ao a’u nei, ou te faamasino i le loto ma le agaga. Taumafai tagata e faaoga le mau a le tulafono e faatoilalo ai Iesu, peitai latou te le iloa lava le Atua e ou tulafono. E lei iloa ma talitonu lava tagata ile Atua, e latou te le iloa lava foi le atalii. “O ifea lou Tama?” Silafia ai e Iesu, afai o tagata lolotu, ae le iloa le Tama i le lagi, o lona uiga ua tamā nei tagata i le alii o le lalolagi.

O Keriso o le malamalama ae leai lava se pouliuli o ia te Ia. O le mea lea, o i latou uma ua o latou iloa le Atua; e savavali i latou i le malamalama. E tau pepeloina i tatou pe a tatou faapea ane, ua o tatou iloa le Atua, ae o tatou savavali pea ile pouliuli, ma ua o tatou lē faia foi le mea moni.

Fanau a le Atua, so o se tagata ua faapea ane ua iloa le Keriso ae musu e ususitai ma savali i ala o Keriso. A o uiga ia o le nuu o le Atua na afua ai ona faatafea ma nofo pologa ai i nuu ese. Ua leai se alofa i le Atua, ua galo poloaiga a le Atua, ua galo ala o le malamalama. Ua galo le afi faaniutu sa fai ma o latou malamalama i le po ao savavali ile vao.

GALUEGA FAATINO:

O le a le uiga o le ola i le tino ma le ola i le Agaga?

PESE: Pese & Viiga 41

A’OA’OGA:

1. Ia Ola i a Keriso.
2. Savavali faatasi ma Iesu.
3. Ia iloa Iesu Keriso i au galuega ma lau amio.

.....

ASO SA: 22 SETEMA 2024

MATAUPU: IESU O LE MATAGOFIE

SINI: Ia malamalama le vasega, o le matagofie o Iesu e silisili lea.

TUSI FAITAU: Fa’aaliga 3:1 – 6

FESOASOANI MO FAIAOGA:

E matagofie Iesu auā o ia na muamua i galuega a le Atua mai le amataga. Na i ai Iesu a o le’i faia le lalolagi, e le i faia ni mea loloto, o ni puna, ma ni mauga. A o le matagofie na faauuina e le Atua, na finau ma tiga faatasi ma liligi ifo e Ia lona lava ola ia togiola ai le lalolagi agasala ma ia manuia ai i tatou.

Peitai, o le taimi lava na sii ai e le tiapolo le tagata ma ua ia manatu ai ua sili lona tulaga nai lo le Atua, o le taimi foi lena na faaletonu ai Sarataisa. Ua latou faimai o lo o fau ma soloi o latou lavalava mananaia, ae le iloa ai lo latou lē lavalavā i le silafaga Paia a le Atua. Talofa i le ekalesia, ua ola i la le tino, a ua matuā mate lava le faaleagaga. Ua ola a ua leiloa ona ola.

E ui a la i nei faafitauli ua alia’e i le ekalesia, ae lei punitia ai le alofa o le Atua e ala i le lapataiga a le agelu ua faaalua, ina ia mataala le ekalesia. Ia iloa e le ekalesia ona ola i se olaga mamā,

ola i se olaga e tumu i le fealofani. Ma ia faamaoni foi i lona va feagai ai ma le Atua.

Ua faaofuina i tatou i le mamalu, le paia ma le matagofie o le Atua aua foi, o lona finagalo lea e pei ona ia faia ai le tagata i le amataga. E tupu ma ola le ekalesia a Keriso i Sarataisa pe a maopoopo loto o tagata ma galulue faatsi. Ia fetalitonua'i lagona ma manatu. Ia ola felagolagoma'i ma fealolofaa'i. 'Aua nei faasili e le tagata ia lava i lo le isi uso a tagata. A ia ola ma le mautinoa, o lo o manatu faatasi tatou ma Keriso.

O le paia ma le matagofie o le Atua, e le gata ina faatusaina i maataua taugata, ae siosioina foi e mea o le foafoaga. O Ia o le amataga ma le gataaga, o le Alefa ma le Omeka. O le o lo o soifua ma e soifua pea lava e faavavau.

GALUEGA FAATINO: Fetufaaiga

Tuu atu le avanoa, e faailoa mai ai e tamaiti ni o latou manatu i le pogai ua faaletonu ai le galuega i Sarataisa.

PESE: Pese ma Viiga 180

A'OA'OGA:

1. Ia fai se suiga i o tatou olaga.
2. E mafai mea uma i le faatuatua.
3. E manuia aiga, nuu ma ekalesia pe a ola i le matagofie o le Atua.

.....

ASO SA: 29 SETEMA 2024

MATAUPU: IA MAUTŪ LE FAAVAE

SINI: Ia malamalama le vasega, o le ola usitai ma faia le finagalo o le Alii o le faavae sili lea.

TUSI FAITAU: Mataio 7: 24 – 27

FESOASOANI MO FAIAOGA:

O Samoa e faavae i le Atua. O le Ekalesia, o lo o i ai lona faavae e mulimulitai i ai le gasologa manuia o ana galuega. Po o fea lava o se tafa o le lalolagi tatou te aumau ai, tatou te tu lava ma tepa i a Samoa na faavae ma fofoa mai ai o tatou olaga. I le faaiuga o le lauga faa-amuia a Iesu i luga o le mauga, o lo o a'oa'o ma faasino ai e Iesu le ituaiga olaga e tatau ma le tagata o le malo o le Atua. Peitai e lē mafai ona avea lea tagata ma sui auai, pe afai e lē savali i aiaiga ma faavae e pei ona faataatia mai e Iesu i le faataoto i tamaloloa e toalua ma fale na la fausiaina.

O le tasi na fau lona fale i luga o le papa. Ua oo ina loulouā le tau, ua tō mai le timu, ua agi mai le matagi, ae le'i afaina le fale. Ona o le mautu ma mausali o lona faavae. Ua faasino i le tamaloloa poto aua ua ia saili i le mea e pito sili ona malosia ma lelei e faia ai lona fale. Ae o le isi fale lea na fau i luga o le oneone, na ona sui lava o le tau, tō mai le timu, ua oo mai tafega ma le matagi, ona paū ai lea ma ua nutipalaina. Talofa e, e vaivai ma galemulemu lona faavae.

E le masino le tele ma le anoanoai o aoaoga ma faataitaiga ua faataoto mai e le Alii, e lima taitaiina ai le soifuaga o le tagata ina ia tumau faamaoni ma faatuatua. Po o le a lava foi le pesi mai o matagi malosia o le olaga, e lē mafai ona toilalo ai, aua o lo o mausali ma mauaa le faavae o lona olaga i le Atua. O le fesili, O a mai lou Faavae? Ua manunu po o maopoopo lava.

O le manatu o le Isaraelu, o latou e tupuga mai ia Aperamo, e mautinoa lava la, latou te saofaga i le ola e faavavau. Lea foi e oo mai i le Feagaiga Fou fai mai, na o latou lava e au i le faaolataga a Keriso. Le *mentality* lea o le Isaraelu po o le Iutaia lea o lo o tauave pea i le taimi nei, ae le iloa, Faimai upu a le atunuu, e ese a le malo vale, ese le malo tiaa. O manatu o le tagata, e lē o le finagalo lea o le Atua. Nei aso, tele ina oia faavae o aiga ma ekalesia i pulega faamatai, aisea? O ai na faia ia suiga?

Ua maliliu nai toeaia ma loomatutua na mamalu ai nuu ma ekalesia. Ua avea le leai o se mea e maua ua faatau ai le tofa ma le faautaga e talepe ai faavae na faataatitia e tuua. Leaga o le tōfā na saili i le Atua, o le tōfā sa faalagolago i le mana lilo o le Atua, e oo a i faavae o Ekalesia. A o upu a le atunuu, aua ete tago i le mea e le o sau mea, le mea e lē au i ai lo tatou malosi, o le mea lena a le Atua o lo o faavae ai aiga ma le EFKS Samoa. E oo lava i le tagata ua iloa tino le Atua ma ia faapea ai, “Lo’u atunuu e, tali i lagi se ao o lou malo”

GALUEGA FAATINO: Faamatalaga

Felafolafoaiga i ni faavae ua sui i totonu o pulega faamatai. *Faataitaiga;* o ni mataupu ua uma ona talanoaina i ni filifiliga faale-ekalesia, a ua talanoaina i totonu o pulega faale-nuu ma toe suia le faaiuga.

PESE: Pese ma Viiga 130

A’OA’OGA:

1. A lelei ona faavae i upu aoai fanau, e manuia ma faaeaina.
2. O Iesu o le faavae o aiga, nuu ma ekalesia.
3. Aua le suia faavae ua uma ona faatulagaina.

.....

**MANATU TAIALA O OKETOPA:
FAATASIGA I LE MALO O LE LAGI**

O le malo o le lagi, o le malo ua uma ona saunia e le Atua mo ona tagata faatuatua ma talitonu i le Faaolataga ia Iesu Keriso. Le malo lea o lo o tausiniō uma i ai le au faatuatua, o ē faia le finagalo o le Atua i le lalolagi. Le malo e lē toe i ai se tīgā po o se pologa, ae na o le olioli loloto o lo o i tua atu o puapuga. O

lona uiga o le malo lea, o lo o nonofo ai tagata sa tautigā i le Tala Lelei, ua o’ofu i ofu sisina, ma latou siosiomia le nofoali’i mamalu o le Atua. Le malo lea ua uma ona saunia e le Atua mo i tatou o tagata faatuatua ma talitonu i lona malo e faavavau.

ASO SA: 27 OKETOPA 2024

MATAUPU : O FANAU O FAAPOLOPOLO MO ASO LEAGA

SINI: Ia malamalama tamaiti, le tāua ma le aogā o sao o fanau i totonu o aiga.

TUSI FAITAU: Salamo 127:1 – 5

FESOASOANI MO FAIAOGA:

O fanau o faamanuiaga a le Atua. O meaalofo mai le Alii mo se ulugalii. O le igaga-tō mai le Atua mo se aiga. O moomooga tupito lea i soo se ulugalii Eperu. Se tama tane na te faaauauina le gafa pe a mavae atu lāua. Se suli e tausia ma puipuia tofi ma measina a aiga. O lona uiga, o le fanau o se auupega taua lea i lima o mātua.

Le ala faa-amuia lea o le fai-Salamo: “*Amuia le tagata e tumu ai lana utu; e lē mamā i latou pe a latou tautala i faitotoa ma e ita mai.*” O lona uiga, amuia ni mātua e toatele se fanau auā e tautuaina i laua i taimi fitā o le olaga. Po o a lava ni tuuaiga, e lē popole pe a faamasino aua e toatele le fanau e toomaga ma faalagolago i ai. Ioe, o le fanau o le faapolopolo mo aso leaga, o se auupega tāua mo le lumanai manuia o aiga. Le uiga lea o le faatusa e le fai-Salamo o fanau – i ū fanafana – pei o upu a le fai-Salamo, “*E pei o u fanafana i le lima o le toa, e faapea lava atalii o taulele’a. Amuia foi le tagata ua tumu ai lana utu.....*”

Le fanau e, e taua tele i matua Isaraelu le i ai o se fanau. E taua aua i le vaai faa-Eperu, O fanau o faamanuiaga a le Atua. O fanau o faapolopolo mo aso leaga. E faalagolago ia i latou le

fa'auauina ma le tauaveina o le mamalu o le igoa o le EFKS. O outou le fanau o ni auupega taua ia i lima o matua mo le lumanai manuia o tatou aiga, nuu, Ekalesia ma le atunuu.

O nisi matua ua fai fanau ma auupega e faataunuu ai manaoga e faapito ia i latou lava. Ua faalagolago tasi i le fanau le faiga o le fatuaiga-tausi ae faa-turisi solo le tinā ma le tamā. Ua ama le manatu i manaoga o le fanau – aemaise o le atiinaega o le olaga faaleagaga. Ua ave le faamua i galuega ma mea e fiafia i ai matua – a ua gase le taunapa i le fanau ma lo latou lumanai manuia.

GALUEGA FAATINO: Faatalatalanoaga.

Aumai se tali a le tamaitiiti i le fesili lea. E faapefea ona fou ia Iesu lou olaga?

Fau ia Iesu. Fau ia malosi lona iloa o le Tusi Paia, ona le gaugofie lea pe a fetau ma le fili. Fau ia sa'o lana amio ma tonu lana filifiliga, ona lē mafai lea e Satani ona gagau lana amio. Fau ia maai lona faatuatua ma le lotomau i le Atua. (tali le faiaoga)

PESE: Pese 180.

A'OA'OGA:

1. Fau le olaga o fanau i a Iesu.
2. Ia ave i tatou ma fanau e manuia ai aiga ma le Ekalesia.
3. Ia atagia i lau amio fautuaga lelei a mātua.

.....

**MANATU TAIALA O NOVEMA:
TAGATA ATOA MO LE ATUA.**

O le loto fuatia ifo, o le loto malie atoatoa i se mea ua e manatu e fai mo le lelei o se isi tagata. O se lagona e mapuna a'e i totonu o lou loto, ma ua faaosofia ai lou manatu e fai se galuega lelei mo se tasi o fia maua se fesoasoani. O lona uiga, o se lagona lelei e tupu ifo i lou mafaufau, o le musumusuga lena a le Agaga Paia i totonu o lou loto ma faaosofia ai ou lagona e foa'i mea sili mo le Atua, e ala i lau tautua i le Ekalesia.

ASO SA: 03 NOVEMA 2024

MATAUPU: FOA'I UMA

SINI: Ia malamalama le vasega, o le foa'i o le galuega e fai i le loto e lelei. O le foa'i e fai i le loto ua faamalieina.

TUSI FAITAU: Luka 18:18 – 30

FESOASOANI MO FAIAOGA:

O lona uiga ea, e foai mea uma; ia ave o mea uma, ae faapefea le ola? Leai, e le o le ave o mea uma ua ia te oe, a o mea ua fuafuaina ma le loto atoa mo le Atua ia foa'iina uma ma ave uma. Masani tatou, e oo mai loa faalavelave, toe vavae loa mea ua uma ona fuafuaina mo le Atua. A le o lena, ua faamuamua le matai, ae faamulimuli le Faifeau. O lona uiga e tatou te faamuamua loa isi mea i le Atua, le mafai loa ona ave mea uma na fuafuaina mo le Atua.

Na fesili le tasi aoao; Le aoao lelei e, se a se mea ou te sao ai i le ola e faavavau? Tali Iesu; E leai se isi e lelei, ua na o le Atua. Atalii; ua e iloa poloaiga? Tali le taulealea; ua leva, na ou tausia mai lava ia mea o iti'iti. Ua toe o le mea e tasi e te lei faia.

Faatau atu ma tufatufa atu au mea uma i e matitiva ona e maua lea o le ola e faavavau. Na silafia e Iesu ua tiga le loto o le taulealea, aua foi o ia o le mauoa, o le ala lena o le fetalaiga a Iesu. “O le mea faigata naua ona sao atu o e mauoa i le malo o le Atua! E faigofie ona ui atu o le kamela i le pu o le au, ae faigata ona sao atu o le mauoa i le malo o le Atua.” E le o mauoa uma, ae o le mauoa ua famuamua ia te ia ana oloa nai lo le Atua.

O le taua o le pu o le au ma le kamela. E tutusa lava le pu o le au ma le pu o le nila; o le kamela, e le o le meaola/manu ae o lona uiga o le maea toso vaa. E matua le mafai lava ona ofi se maea toso vaa, i se pu o se au o le mea faigata lava. Ua silafia e Iesu, ua faanoanoa le taulealea, ina ua ia faamuamua ana oloa, nai lona avanoa i le ola e faavavau. O le uiga o upu a Keriso, e lē sao i le ola e faavavau i se tamaoaiga. Ae o le foai, ona o le alofa. Alofa i lou Atua i le malosi, loto, mafaufau ma mea uma. Ia e alofa foi i lou tuaoi e pei o oe lava ia te oe. Foa'i mea uma, o mea ua fuafuaina ma le loto atoa mo le Atua ma lana galuega.

GALUEGA FAATINO: Faatino le Tala

Fai se faatinoga o le tala e iloa ai le ola foa'i.

PESE: Pese ma Vi'iga 157.

A'OA'OGA:

1. Fiafia e ola foa'i ma le loto atoa.
2. E manuia lē e foa'i i lō le na te talia.
3. Fiafia e foa'i mo le Atua.

.....

ASO SA: 10 NOVEMA 2024.

MATAUPU: ALOFA E LĒ UMA

SINI: Ia a'oa'o le vasega ina ia malamalama, o le alofa o le Atua e lē mavae i ai tatou i aso uma.

TUSI FAITAU: Isaia 41:14 – 20

FESOASOANI MO FAIAOGA:

Tele lava o tatou, e fetaia'i loa ma puapuaga, ona manatu lea ua lē alofa mai le Atua. Afai foi tatou te maua manuia i le olaga lenei, o lo o finagalo le Atua, ia faatino ai le alofa, ma ia maua ai se viiga. E faapea uma lava le mea na oo ai puapuaga ile nuu o le Atua ma faatafea ai i Papelonia. Ua atua i le tamaoaiga ae faatuatuanai le Atua soifua.

Lea ua toe foi le tafeaga; faamalosi le perofeta o Isaia. Ua outou foi mai puapuaga, e le o le finagalo alofa lena o le Atua. O le Atua mai lava i le amataga, o le Atua o le alofa ma le alofa mutimutivale, o le alofa e le uma. O le a le tele o a outou agasala i luma o le Atua, e lē mavae ai le alofa faifaipea o le Atua. Tautino le perofeta; Aua le fefe, ou te fesoasoani ia te oe, ua fetalai mai ai le Alii. O le a lava le leaga o tagata o Isaraelu, e lē uma ai le alofa o le Atua.

Fetalai manino le perofeta; “O ē ua tigaina ma ē matitiva o loo latou saili i se vai, a ua leai; ua matutu o latou laulaufaiva i le fia inu; o a'u o le Alii ou te tali atu ia te i latou, o au o le Atua o Isaraelu, ou te le lafoa'iina i latou.” O upu o le alofa e lē uma o le Atua. E lē o so tatou malosi ma so tatou potu; ae o le alofa lē uma lena o le Atua ia te i tatou. O le a sau maitau i lou tupuaga ma le siosiomaga. O le alofa lē uma lena o le Atua.

Tele mea e tiga ma mafatia ai lo tatou ola; ae o le feau a le Tala Lelei; E lē uma le alofa o le Atua mo ona tagata. Pau lava o lea ia tatou tumau i le Atua, ona o tatou maua lea o lona olioli e faavavau. O lau tautua ma lou tautiga i le Atua e leai se mataua o lou afu sisina, e le o faitaulia e le Atua.

GALUEGA FAATINO: Tusigā solo.

Tu’u le avanoa i tamaiti e tusi mai ai ni ā latou solo e faamatala mai ai le alofa o le Atua iā i tatou. Ia lua palakalafa o le solo, fa laina i le parakalafa

PESE: Le alofa o le Atua e ofoofogia.

A’OA’OGA:

1. Ia tatou iloa le alofa mai o le Atua iā i tatou.
2. Fai sau galuega lelei e tali atu ai i le alofa o le Atua.
3. Alofa poto.

.....

ASO SA: 17 NOVEMA 2024.

MATAUPU: E MALOSI MA U’AU’A PE A PULUPULULIMA FAATASI

SINI: Ia malamalama le vasega, o le galulue faatasi e mautu ma mau ai le fiafia.

TUSI FAITAU: 1 Korinito 11:17 – 22

FESOASOANI MO FAIAOGA:

O le tusi sa faitauina, o tu ma aga faa-Korinito, i ana potopotoga faa-Ekalesia. Faigā ‘ai o le alofa. O faigā ‘ai fa’aagafesootai i fetufaaiga o meaai ma mea inu. O le faamoemoe ia aai faatasi o le ekalesia e tasi, ia aai faatasi e matitiva ma tagata mau-oloa. O le faamoemoe ia nofo lelei ma feoeoeai le Ekalesia. Paga lea, ua le faapea ona fai e tagata o le Ekalesia. Ua mamao le mea o i loto o tagata mau oloa ma le faamoemoe o le potopotoga faa-Ekalesia. Ua aai i vaega; aai lava le au mau oloa, aai le au

matitiva. Ua fua le mea e saofai ai le tagata i lona tamaoaiga, ua fua foi le mea e nofo ai le tagata i lona suafa ma lona tupuaga.

Manatu ia o tagata Iutaia ua faamanatu ai e le aposetolo o Paulo; “Pe a potopoto outou I le mea e tasi, e le faapea outou ina ia outou aai i le Talisuaga a le Alii.” Silasila ane ua laina le tasi, ua onā le tasi. O la le aposetolo; ia tatou o i luma o le Alii, e tutusa tatou uma. O taimi uma e tatou te osi taulaga ai i luma o le Atua, i le osiosiga o aiga, le nuu ma le Ekalesia, ia tatou fetufaaai ile alofa, ia faatino ae le na o upu.

Upu a le Tusi Paia; E te ai meaai i le afu o lou muaulu. Faamanatu pea le moto tauave a le ekalesia; galulue ma le lototetele. O le faamoemoe o aso faapenei; ia fetufaaai ma fefaasoaaai tagata uma. Ua tigaina lava le ua tigaina, ao la lava e nofononofo lava le isi.

United we stand, divided we fall. O se fatuga o lo o aumai ai se lagona, a tutū faatasi ma le fealofani, e faigofie ma mafaia mea uma. Po o le a le faigata o se tausinioga, o le a foi le mamafatū o se avega, e pei lava o le mea fua lona faatinoga, pe afai lea e loto tasi tagata uma. E ese foi le manaia o se aiga ae galulue faatasi mātua ma le fanau, auā po o le a le toatele o se mafutaga, ae afai e lē fesootai I le fealofani, e leai lava se mea e mafai ona fai. Ae po o le a le toaitiiti ma le toagaogao, ae afai e tutusa loto, e faigofie lava ona sii le mauga i le sami.

GALUEGA FAATINO:

Saunia e le faiaoga ni fesili mo tamaiti faatatau i le mataupu.

PESE: Pese ma Vi’iga - 73

A’OA’OGA:

1. Limalima faatasi e māmā ai se avega.
2. E maopopo i le galulue faatasi.
3. Savavali faatasi ma Iesu.

ASO SA: 24 NOVEMA 2024.

MATAUPU: **MATIVA I FOLIGA AE MAUOA I LE ALOFA.**

SINI: Ia a’oa’o le vasega ina ia latou malamalama i le tagata e ola mativa, ae fialia e lima foa’i.

TUSI FAITAU: 2 Korinito 9:1 – 15

FESOASOANI MO FAIAOGA:

O lo o ua faamatala e Paulo le tau i o le foai ma le loto alofa. O lea tau e fua i le foai e faia e le tagata; o le foai e faia ina ua filifili i ai le loto. Le tagata lea fai mai le aotelega; e alofa le Atua i lana foai. O lona tau foi lea; *Alofa iai le Atua*. O le a le uiga? E fa’aaliali i ai le alofa o le Atua ma faamanuia ma agalelei i ai le Atua. O le ua foa’i tele atu ana saito/areto, o le a foa’iina tele mai lava e ia a latou saito e lūlū, o le a faateleina e ia le fua o la outou amiotonu. O le a faatamaoigaina outou i mea uma lava, e tupu ai le matamau ma le faafetai i le Atua, e le gata e manuia ai le galuega a Keriso, ae faateleina ai ma le viiga o le Atua. O la le fai-Salamo 112: 9; *Ua faasalalauina e ia ana mea, ua avatua e ia i e matitiva; e tumau lana amiotonu e faavavau.*

O le sii mai e Paulo o le fuaitau mai le Salamo 112; ina ia aumai ai le isi ata lea o le tagata foa’i ma le loto malie, o le tagata e mata’u i le Atua, pe o le tagata amiotonu. Le tagata lea e le gata na te maua manuia e tele, ae ua manuia ai ma nisi i lana foa’i, e pei o i latou o moomia le fesoasoani. O le faamoemoe o le aposetolo ia tau atu i tagata, ia le gata i le itu faaletino ae faapea foi i le ola faaleagaga, o le loto malie o le foa’i a le tagata faatuatua. O le ola matau i le Atua, e tau amiotonuina ai le tagata faatuatua, e mautinoa ai le faateleina o le manuia o le tagata foai ma le loto malie. O lona uiga, o le Atua na Ia foa’i le

ola ma faateleina le ola, o ia lava e foa’i ma saga faatupu le saito o le amiotonu e afua mai ai le foa’i o le loto malie i tagata lotu. Le loto malie e faavae i le lagonaina e le tagata faatuatua, o le alofa tunoa o le Atua. E le fuaina i se fua, ona o le alofa tunoa o le Atua na faia ma lona alofa atoa, ina ia ola le tagata agasala; o se faaeaina e leai sona gataaga.

Fai mai Paulo o le tagata ua filifili i lona loto e foai ma le loto malie, e taua o le tagata mulimuli ma le usitai ia Keriso. O le meaalofo foai fuaina mai a le Atua (alofa tunoa), o le afuaga lea e tatau ona faavae ai le soifua foai pe o le soifua fai-aulaga o le tagata faatuatua. Le foai ua faia mai le filifiliga o le loto ua malie ma le alofa. O le soifua fai-aulaga o Keriso, ua nofo tupu i le lagi. O le tāua lea o le tatala o le loto, e le tau faatonuina ai lau foa’i e fai, a o le tatala o le loto e iloa atu ai le mafatia o isi tagata, o lo o fia maua le fesoasoani, o le uiga lea o le manatu a le aposetolo. Ma ua aumai ai se a’oa’oga mo tatou ina ia tupu pea le loto foa’i mo i si toe fia maua le fesoasoani, ae lē o le musu e foa’i ona o le matape’ape’a auā ua tele mea ua maua, ma ua faapogisa ai la tatou va’ai atu i manuia e maua e le tagata e fialia e foai ma le loto malie.

GALUEGA FAATINO: Finauga.

Vaelua le vasega i le itu **Talia** ma le itu **Tete’e** i le mataupu ua tuu atu. **“Pe moni tatou te mauoa i le Alofa?”**

PESE: Pese ma Vi’iga – 143.

A’OA’OGA.

1. Foa’i ma le loto malie.
2. E manuia le tagata lima foa’i.

.....

MANATU TAIALA O TESEMA: MŌLĪ O LE AVA

Ua faatāua i lenei masina Iesu Keriso le Pepe o le Kirisimasi. Ua faatusa o ia o le Moli e susulu ma pupula mai i le ola o talavou le Keriso e ala i ō latou ola ua ola ai Keriso ma fa'aalia ai lona finagalo faaola. O ā suiga ua aafia ai le ola o tupulaga i nei aso, ae a pipii ma savali lava i le malamalama o le mōlī, e tumau i lana amiotonu i ō latou olaga

ASO SA: 01 TESEMA 2024.

MATAUPU: O LE MALAMALAMA I LE POGISA

SINI: Ia malamalama le vasega, Iesu o le malamalama i le lalolagi atoa.

TUSI FAITAU: Isaia 9: 1 – 7

FESOASOANI MO FAIAOGA:

O le mulimuli atu ia Iesu; o le talitonu ma le faamoemoe lava lea ia te ia, ona maua lea o le ola ma le malamalama e i latou uma ua talitonu ia te ia. O e lei talitonu lava, e savavali lava i le pouliuli, auā ua fialia lava latou i le pouliuli. O le ola o le malamalama. Ua ia i tatou le malamalama, ae tatou te le i talia lava ma le faamaoni. Ua pupula mai foi le malamalama, ae ua taumafai foi le pouliuli e faatoilalo, ae e lei manumalo i ai le pouliuli.

O le mataupu la lea na tatou faitauina, o le faamalosiua lea ma le faalaeiau a le perofeta e tusa ma tiga o lo o feagai nei ma le nuu. “A e le po pea i le nuu ua puapuagatia; faapei ona ia faaleaogaina anamua o le nuu o Sepulona ma le nuu o Nafatali; e faapea ona ia faamamaluina ai i Iona po amuli; o le ala i le vai, o le mea i tala ane o Ioritana, o Kalilaia o nuu ese.

E pei o lo o faapea atu Isaia. Iuta, ia onosai, ia toa le tai ma ia mau pea le toovae, aua nei i ai se mea e gase a ia fifilemu. O a

fita, o a faigata, o le a foi le maemaea o Asuria ma ana faiga o lo o fai, aua le popole, ae faamoemoe i le Atua, taulai lau vaai ma lau maitau i le lumanai, auā e i ai le taimi o le Atua na te saunia le malamalama sili mo tatou. O le malamalama e gausia le amo o le avega, aveesea foi le sasa nai le ua, faapea foi le tootoo a lē ua sauā ia te ia. Aua e fanau mai mo i tatou le tama, ua foa'iina mai mo i tatou le atalii, e i lona ua le malo, e igoa foi o ia, o le Silisili Ese, o le Faipule, o le Atua malosi, o le Tamā o le faavavau, o le Alii o le filemu.

Tautala le perofeta agai i le lumanai, le malamalama o le Atua e faamalalamaina uma ai le lalolagi, e le gata ina susulu mai ma lofia ai le lalolagi atoa, ae faapea foi ona susulu i totonu o le loto ma le agaga o le tagata, e faamalalamaina le pogisa o lo o faatauasoina ai mata faaleagaga e iloa ai le pule aoao a le Atua.

O le faatuatua i le Atua ma le faamoemoe i le lumanai, o le auala lea e mafai ai e le tagata kerisiano ona tulai e faafetaui i fita ma faigata o le ola nei, o le malosi foi lea e mafai ai e le tagata faatuatua ona maua le filemu ma le toamalie, pe a oo ina siisii ma sousou le vasa o le ola nei.

GALUEGA FAATINO:

Ia fesiligia le vasega e faatatau i ō latou manatu po .o ai le malamalama e faasusulu mai.

PESE: Pese & Viiga 84.

A'OA'OGA.

1. Ola i le malamalama o Keriso.
2. O le malamalama na te sosofaina le uiga natia o le pogisa
3. Fai lou talavou ma talavou amio lelei e tusa ma le malamalama o le Atua.

ASO SA. 08 TESEMA 2024.

MATAUPU: MEAALOFA SILI

SINI: Ia malamalama le vasega, o le ofo atu o le ola mo Keriso o le meaalofo sili lea.

TUSI FAITAU: Efeso 4: 7 – 13

FESOASOANI MO FAIAOGA.

E faigofie le fai meaalofo i ē tatou te alolofa i ai, ae faigata o tatou fili. O le ā se ta meaalofo mo tatou matua? Afai e leai ni meaalofo, e peiseai ua leai se fiafia. Afai e fa'aali lou alofa, ave sau meaalofo e fai ma ou sui. A o le meaalofo sili, o le ave o oe. O le tusi faamalosi 'au a le aposetolo o Paulo i lona atali'i faale-Agaga o Timoteo, ina ia matuā faamalosi i le galuega o le talaiina o le Tala Lelei ia Iesu Keriso. O taimi o faigata o le galuega o feagai nei ma Paulo, ae o le manao o Paulo ia iloa e Timoteo le tāua o puapuaga mo Keriso. O le meaalofo lea mai le Agaga o le Atua, na tuuina ia Paulo lea ua ia tautala ai ma le mautinoa, i faiga meaalofo eseese a le Atua, lea foi na tuuina mai i lona tagata.

O meaalofo mai i le alofa tunoa, ua mautinoa e Paulo e agavaa uma i ai tagata uma, pe a salamō ma faatuatua i le Atua. O le mea ua tatou mautinoa i le soifuaga nei, ua i ai lava taleni ua tofusia ai tagata eseese; e pei o le foma'i, faiaoga, leoleo ma isi. O lona uiga, ua saunia e le alofa tunoa o le Atua, avanoa eseese e fa'aogaina i ai le soifua ma le ola o lana fanau. Na afio mai Iesu i le lalolagi ma faia le galuega faaola ma le galuega talai, o le meaalofo sili lea mo tagata, ma o le finagalo foi lea o le Atua. O meaalofo a le Agaga, na mafai ai e le ausoo ona fa'aauau le galuega talai ma faalautele le finagalo o le Atua.

GALUEGA FAATINO: Faatalanoaga

Faatalatalanoa le mataupu i le vasega, i se meaalofo taua i le soifua ma le ola.

PESE: Pese & Viiga 184.

A'OA'OGA:

1. Fai sau meaalofo mo Iesu.
2. Ofo lou ola mo Iesu.
3. O le Atua fai meaalofo.

.....

Manuia le Kerisimasi ma le Tausaga Fou